

項城縣志卷二十二

人物志一

名臣

漢

應順字華仲少給事郡縣為利清公不獲私書舉孝廉尚書郎轉右丞遷冀州刺史廉直無私遷東平相賞罰必信吏不敢犯有梓樹生於廳事室上事後母至孝眾以為孝感之應時竇憲出屯河西刺史二千石皆遣子弟奉賂遺憲憲敗後咸被繩黜順獨不在其中由是顯名為將作大匠視事五年省費億萬

後漢書應

奉傳注引華燾書

應奉字世叔汝南南頓人也曾祖父順字華仲和帝時為河南尹將作大匠公廉約已明達政事生十子皆有才學中子疊江夏

太守疊生柳武陵太守柳生奉奉少聰明自為童兒及長凡身
經履莫不暗記讀書五行並下為郡決曹史行部四十二縣錄
囚數百千人及還太守備問之奉口說罪繫姓名坐狀輕重無
所遺脫時人奇之原注謝承書曰奉少為上計吏許訓為計掾
俱到京師訓自發鄉里在路畫頓幕宿所見
長史賓客亭長吏卒奴僕訓皆密疏姓名欲奉還鄉出疏示
本奉云前食穎川綸氏都亭亭長胡奴名祿以飲漿來何不在
疏坐中皆驚又云奉年二十時嘗詣彭城相表賀賀時出行開
門造車匠於內開扇出半面視奉即委去後數十年於路見
車匠識著漢書後序多所述載原注袁山松書曰奉又剛史記
而呼之漢書及漢記三百六十餘年自
漢興至其時凡十七卷名曰漢事大將軍梁冀舉茂才先是武陵蠻詹山等四
千餘人反叛執縣令屯結連年詔下公卿議四府舉奉才堪將
帥永興元年拜武陵太守到官慰納山等皆悉降散於是興學
校舉側陋政稱變俗坐公事免廷喜中武陵蠻復寇亂荊州車
騎將軍馮緄以奉有威恩為蠻夷所服上請與俱征拜從事中

郎原注謝承書曰時詔奉曰變夷叛逆作難積惡放恣鎔中之
播越魚火熾湯盡當悉燠燠以刷國恥朝廷以奉昔字而土成名
萬枝庫方具劍金錯把刀劍革帶各一奉其勉之 奉勤設方
略賊破軍罷鯤推功於奉薦為司隸校尉糾舉姦違不避豪戚
以嚴厲為名及鄧皇后敗而田貴人見幸桓帝有建立之議奉
以田氏微賤不宜超登后位上書諫曰臣聞周納狄女襄王出
居於鄭漢立飛燕成帝崩嗣泯絕母后之重興廢所因宜思關
雎之所求遠五禁之所忌帝納其言竟立竇皇后及黨事起奉
乃慨然以疾自退追愍屈原以自傷著感騷三十篇數萬言諸
公多薦舉會病卒子劭後漢書本傳

晉

應詹字思遠汝南南頓人魏侍中璩之孫也詹幼孤為祖母所養
年十餘歲祖母又終居喪毀頓杖而後起遂以孝聞家富於財

年又稚弱乃請族人共居委以資產情若至親世以此異焉獨
冠知名性質素弘雅物雖犯而弗之校以學藝文章稱司徒何
劭見之曰君子哉若人初辟公府為太子舍人趙王倫以為征
東長史倫誅坐免成都王穎辟為掾時驃騎從事郎諸葛玫
委長沙王乂奔鄴盛稱乂之非玫浮躁有才辯臨漳人士無不
詣之詹與玫有舊歎曰諸葛成林何與樂毅之相詭乎卒不見
之玫聞甚愧鎮南大將軍劉弘詹之祖舅也請為長史謂之曰
君器識弘深後當代老子於荆南矣仍委以軍政弘著績漢南
詹之力也遷南平太守王澄為荊州假詹督南平天門武陵三
郡軍事及洛陽傾覆詹攘袂流涕勸澄赴援澄使詹為檄詹下
筆便成辭義壯烈見者慷慨然竟不能從也天門武陵難蠻並
反詹討降之時政令不一諸蠻怨望並謀背叛詹召蠻酋破銅

券與盟由是懷詹數郡無虞其後天下大亂詹境獨全百姓歌之曰亂離既普殆為灰朽僥倖之運賴茲應后歲寒不彫孤境獨守拯我塗炭惠隆丘阜潤同江海恩猶父母鎮南將軍山簡復假詹督五郡軍事會蜀賊杜疇作亂來攻詹郡力戰摧之尋與陶侃破杜弢於長沙賊之金寶溢目詹一無所取唯收圖書莫不歎之元帝假詹建武將軍王敦又上詹監巴東五郡軍事賜爵潁陽鄉侯陳人王冲擁衆荊州素服詹迎為刺史詹以冲等無賴棄還南平冲亦不怨其得人情如此遷益州刺史領巴東監軍詹之出軍也士庶攀車號泣若戀所生俄拜後軍將軍詹上疏陳便宜元帝雅重其才深納之頃之出補吳國內史以公事免鎮北將軍劉隗出鎮以詹為軍司加散騎常侍累遷光祿勳詹以王敦專制自樹故優游詠詠無所標明及敦作逆明

帝問詹計將安出詹厲然慷慨曰陛下宜奮赫斯之威臣等當得負戈前驅庶憑宗廟之靈有征無戰如其不然王室必危帝以詹為都督前鋒軍事護軍將軍假節都督朱雀橋南賊從竹格渡江詹與建威將軍趙胤等擊敗之斬賊帥杜發梟首數千級賊平封觀陽縣侯食邑一千六百戶賜絹五千匹上疏讓曰臣聞開國承家光啟土宇唯令德元功乃宜封錫臣雖忝當一隊策無微畧勞不汗馬猥以疏賤倫亞親密暫廁被練列勤司勳乞迴謬思聽其所守不許遷使持節都督江州諸軍事平南將軍江州刺史時王敦新平人情未安詹撫而懷之莫不得其歡心百姓賴之以咸和六年卒時年五十三冊贈鎮南大將軍儀同三司謚曰烈祠以太牢子玄嗣位至散騎侍郎玄弟誕有器幹歷六郡太守龍驤將軍追贈冀州刺史初京兆韋泓喪亂

之際親屬遇饑疫並盡客遊洛陽素聞詹名遂依託之詹與分
甘共苦情若弟兄遂隨從積年為營僉儷置居宅并薦之於元
帝帝即辟之自後位至少府卿既受詹生成之惠詹卒遂製朋
友之服哭止宿草追趙氏祀程嬰杵臼之義祭詹終身

節晉書本傳

宋

喬維岳字伯周陳州南頓人治三傳周顯德初登第授太湖主簿
四年遷平輿令開寶中右拾遺劉種薦其才擢為太子中舍知
高郵軍通判揚州徙常州金陵平又移昇州改殿中丞太平興
國初徙襄州俄丁內艱三年陳洪進表納疆土以其子文顯為
泉州留後朝廷議擇能臣關掌郡事即起維岳為通判會盜起
仙遊莆田縣百文鎮衆十餘萬攻城城中兵裁三千勢甚危急
監軍何承矩王文寶欲盡屠其民燔府庫而遁維岳挺然抗議

以為朝廷寄以綏遠今惠澤未布盜賊連結反欲屠城豈詔書
哉承矩等因復監守既而轉運使楊克讓率福州兵破賊圍遂
解詔褒之歸朝為淮南轉運副使遷右補闕進為使淮河西流
三十里曰山陽灣水勢湍悍運舟多罹覆溺維岳規度開故沙
河自末口至淮陰磨盤口凡四十里又建安北至淮濇總五堰
運舟所至十經上下其重載者皆卸糧而過舟時壞失糧綱卒
隸此為姦潛有侵盜維岳始命砌二斗門于西河第三堰二門
相距五十步覆以厦屋設縣門積水俟潮平乃泄之建橫橋岸
上築土累石以牢其址自是弊盡革而運舟往來無滯矣嘗按
部至泗州慮獄法掾誤斷囚至死維岳詰之法掾俯伏且泣曰
有母年八十餘今獲罪則母不能活矣維岳憫之因謂曰他日
朝制按問第云轉運使令處茲罪卒如其言獲免維岳生贖金

百二十斤罷使職權知楚州遷戶部員外郎代還為度支判官
轉本曹郎中出為兩浙轉運使歷知懷州滄州會考課京朝官
召還屬真宗以壽王尹京精擇府僚留為開封推官或言維岳
在淮南決獄不平允左右有知其事者辨之太宗特加賞異儲
闈建兼左諭德轉太常少卿京府事繁維岳評處詳敏有主涉
為司錄真宗亦稱其明幹及踐阼即命維岳與畢士安權知開
封府拜給事中知審官院維岳體肥再瘵艱於拜趨陳乞外遷
小州上嘉其靜退特授海州刺史咸平初知蘇州素病風土以
吳中多食魚蟹乃徙壽州仍命太醫馳療之四年卒年七十六
贈兵部侍郎官給其葬大中祥符中錄其孫世昌獻之並賜同
學究出身維岳明習吏事有治劇才在懷州王欽若始舉進士
維岳知其貴又善待陳彭年自刺郡連奏為通判皆稱薦之

宋史

明

張邁字逢道號蔡川由進士令山西潞城縣政治平棘圍纜可蝟
緯邑猾大氏窮靡矣擢侍御隸留京廣東道清山東軍振濯風
猷已陞山西湖廣廉訪副晉兩浙長憲山東右轄尋陟左持天
體所至稱寬仁焉入為京兆遷起亞卿頃之改少司徒請懸車
詔許傳歸壽如申公之年卒曰武宗賜葬祭

婁志德由進士守直隸趙州赤心愛民而下從化蒸蒸蜚譽陞地
官員外郎督餉陝軍未嘗私羨陞杭州太守黎民乂安吏懦懦
懼佚於法陞閩運使浙省參知己又轉福建方伯歷左右秩焉
晉南僕卿常卿都御史建節山東卒於官數歷中外總若干歲
而冰蘖之操慄慄如一日也所著如兩浙賦役成書卓有實濟

馬長安語曰天下清官婁志德穆宗有詔褒美贈工部侍郎謚

莊肅遣官修塋兆諭祭

以上舊志

國朝

于嗣昌字文侯以父貴為蔭生幼性敏讀不甚力師嚴督之因謝曰異日貴當重報師無苦也師曰今日督責正計異日報耳由是折節讀書文克大進壯遊京師或有譖蔭生多不識丁者奉命殿試文成

仁皇帝閱之大喜謂左右曰于嗣昌文

可中進士時在丹墀跪聽未審因未謝恩獲譴糾儀官

馬自是益感昔師督責思甚深也初任關東治中皇莊內有

因姦被殺一案訪其實因請其父兄次復延及其子弟時某子腰懸匕首甚飾嗣昌借觀之至門外口試其刃味鹹甚席畢送諸子出獨留此子一訊得實遂按法焉其不畏強禦類如此邇

時復有金雍字拾弓者傳為聖歎子以罪為軍嗣昌令洗沐坐書室中初至若呆若癡及坐數日偶檢伊父著述哭不自禁久之予以筆硯為文揮毫不輟為贖而出之其憐才好士為何如者及轉袁州太守承平既久政暇無事慨想逸火風流日與諸賓客賢士晏遊其間自為記勒於石焉繼遷雲南鹽道前任負帑萬金嗣昌慨為任不以相累及轉杭州臬憲先是杭中有巨惡楊大復者其人工丹青通五鬼搬運術每物邑一美人尾之夜即以術搬運至每淫一人則寫一圖積有百美圖云杭之人皆深恨之而無可如何甫下車投狀以攻其惡者且數百紙拘至其人衣冠甚偉稱山人立而不跪加以嚴刑敲擊數十無懼邑知有邪術用印封其刑具為之退食升堂復審伊之伎倆窮矣遂盡吐實是夜斃於獄杭人感激門首各設木主以頂禮焉

在杭護理三月巡撫印務報陞山東藩司未及赴任病卒於官

署時康熙四十一年也

節家傳視舊志較詳

袁中三河南項城人道光十五年進士以主事用分禮部二十年補官二十三年充軍機章京二十七年八月升員外郎九月以捐備本籍賑需下部議敘二十九年遷郎中三十年五月擢江南道監察御史尋稽查豐益倉六月疏云夷務之興已及十年在事諸臣或倉皇失措坐失機宜或庸懦無能藉以要挾我

宣宗成皇帝軫念民生曲從所請藉示羈縻上年廣東力拒進城制其要領薄海臣民同深歡頌我宣宗成皇帝為民

屈己之心亦歷年始獲稍慰本年春聞該夷乘我皇上

御極之初故智復萌藉端嘗試幸賴聖志堅定屹然不

搖俾該夷不戰而屈儻當時稍有游移則疆事又多反覆矣今

當外患稍平內政急宜修治應請

旨飭下大學士九卿

將從前之錯誤後此之防維虛衷詳議久遠是圖俾天下咸知公論之難誣自強之足恃振興鼓舞衆志成城則夷人咸慄然於天朝紀綱整肅莫得動搖自可日久相安矣報

聞七月擢兵科給事中九月疏劾廣西巡撫鄭祖琛慈柔釀患致賊充斥及粉飾彌縫狀詔褫祖琛職又疏劾江西巡

撫陳旰與屬吏狎妓飲酒賄賂交通

命下江西學政張

芾按之得實褫陳旰職十一月轉兵科掌印給事中時戶部請開捐例甲三奏言皇上御極之初曾詔停捐輸

未及一年不便舉行請

收回成命咸豐元年正月

詔免各省錢糧積欠甲三疏言官吏奉行

愚旨每遲久

而後覈定挪移侵蝕弊竇叢生請限以三月開單奏明並嚴禁

延醫膳黃均

先行二月

上以祈穀禮成

加恩太常寺執事各員悉予議敘甲三疏云滿假之漸即驕泰之機天難忱斯不易維王請

皇上宸居齋心益勵寅畏

時懍克艱之義彌嚴昭事之忱

上嘉納焉又疏舉將才

將廣州副都統烏蘭泰京營總兵達洪阿江蘇道員嚴正基湖北道員姚瑩等以

聞十月南河豐北決口甲三疏請因

決口導河由大清河入海使水行地中免隄防之勞橫決之患二年五月以廣西會匪洪秀全等竄擾湖南

命湖廣總

督程喬采督辦防勦

欽差大臣賽尚阿自廣西移軍追

賊甲三疏陳軍務事權宜一程喬采以總督駐衛州守土之臣責無旁貸若復令賽尚阿持節移軍恐在事文武各分畛域諉過爭功互相掣肘况賊已出巢尾追更難制勝請

命賽

尚阿回京供職而

詔程高采便宜行事如有疏虞按律

定罪時湖北巡撫龔裕聞賊入境託疾乞休甲三疏請治罪以

昭炯戒並言失守人員每奏請隨營曲為開脫請

飭禁

止報

聞六月列款奏參定郡王載銓及刑部侍郎書元

貪鄙險詐諂事載銓疏云載銓在

先帝時本未深資倚

畀書元由司員循例升至侍郎更屬無所表見今蒙

皇

上稍示優容遂各肆意妄行不恤物議邪正消長之機當亦

先帝之所降鑒也

皇上見以孟秋大祀虔宿

齋

宮

先帝之靈寶式憑之儻蒙

乾威獨斷俾大小

臣工無不知感知懼天下幸甚臣受

先帝養之恩十

餘年如有挾私妄訐搖惑

聖聽之處

先帝陟降

在天斷不令臣倖逃法網也疏入

命甲三明白迴奏甲

三覆奏辭益切

詔除載銓內大臣差使並奪王俸三年

書元亦鐫級三年正月工部侍郎呂賢基奉

命赴安徽辦

理團練防勦事宜奏請調甲三赴營幫同辦理軍務

允

之時粵匪陷鳳陽府踞臨淮關煽動土匪連破懷遠蒙城將由毫淦窺河南甲三至軍疏言賊勢未遠北犯請益定

聖

志以固民心

諭在事諸臣勿涉張皇及其羽翼未成力

為圖制報

聞六月署廬鳳道分月抵正陽關時潁州漢

回相焚殺圍府城甲三出示曉諭謂同僚

朝廷赤子不

問漢回但分良莠別首從誅倡亂者毋致結黨尋釁遣同知張

家駒解散良民擒首犯張銀盤等斬之九月兵部侍郎周天爵

卒於亳州之王市集

命甲三代領其衆先是周天爵奏

蒙亳匪衆合五十八捻為一有四大天王諸名目不急滅禍未

艾未及剽而天爵卒甲三至王市集兵勇已散民無固志賊進踞孫
村店甲三急收集散勇飭鄉團扼要隘遣遊擊朱連泰等擊賊
於高公廟大破之捷

聞得

旨袁甲三接辦勦匪

事宜即能激勵兵勇將大股擒匪迅速兜勦辦理尚合機宜尋
加三品卿銜署安徽布政使甲三疏言見在勦辦擒匪正當喫
緊一署地方限於職守勦匪事宜轉恐貽誤得

旨毋庸

署理布政使即以三品卿銜兵科給事中勦辦安徽擒匪時擒
首鄧大俊由雒河集擾及標里鋪甲三分兵襲之擒其渠鄉民
先後緝獻者二千餘悉置諸法尋疏言金陵百姓有為義約告
上江兩縣訂期圖收復者揚州難民有於城上言賊不多怨官
軍不戰者且有願殺賊以應者無如統兵大臣均置之不聞致
百姓謀洩被戕坐使忠義解體然

朝廷厚澤在人忠憤

未泯急作其敵愾之心許以非常之賞義旗所指當可奏功保
旨飭 欽差大臣向榮琦善剋期攻勦十月粵逆由安慶
犯集賢關竄據桐城縣旋陷舒城縣呂賢基死之 命甲

三由潁州移軍桐城甲三疏言捻逆張茂踞懷蒙聞稱偽西懷
王竄廬郡非臣親往督辦人心愈搖應先赴蒙亳一帶為各郡
聲援以便聞警馳應如所請行時潁亳捻匪經官兵屢勦併踞
雒河集甲三飭縣丞徐曉峯等破之擒賊渠孫重倫賊另股潛
竄臨湖鋪復分兵擊之擒賊首宮步雲賊黨馬九等謀劫步雲
甲三遣遊擊李成虎等分兩路擊之擒馬九等並賊目數十各
擒首搜捕殆盡得 旨嘉獎甲三以張茂在懷遠勢尤熾
遣遊擊錢朝舉等往勦聲言親督大隊繼進頒示散其黨朝舉
至與知縣朱鎮督團勇一戰破之張茂受傷遁十一月疏言皖

省南路宜勦北路宜防防勦兼施非多兵不可皖省兵力過
查陝甘總督舒興阿所帶陝甘兵尚在陳州請飭赴南

路會勦

從之旋以賊撲廬州甲三馳赴宿州防賊北犯

奏請催舒興阿速援廬州並分兵扼正陽關以防北竄

上命舒興阿撥兵駐防甲三於徐宿擇要駐紮為臨淮後應于
二月賊陷廬州巡撫江忠源死之甲三奏請及賊未定急圖收
復上命在籍侍郎曾國藩以水陸軍由九江急趨安徽

並劾舒興阿擁兵坐視致廬州陷舒興阿遂褫職四年正月甲
三以賊久據廬州慮其旁擾疏請撥兵防壽州六安上

命河南巡撫英桂調兵防堵二月賊陷六安竄蒙城甲三進擣
蒙城賊走永城甲三奏言永城四路可通賊將竄宿州趨徐州
徐州為糧臺重地急應嚴防上命甲三確探賊蹤迎顛

袁勦甲三逃賊及於蕭縣賊前股已渡河後股折而南走乃奏云賊蹤飄忽渡河者萬難追及徐州鎮道兵勇足勦土匪臣應折回宿州嚴堵南路竄匪遂引軍還
上嚴飭之

諭曰糧臺重地必應嚴為防範前有旨令袁甲三趕接以遏賊匪北竄該給事中何以竟行折回置北來之賊於不顧五月賊由黃河南竄甲三敗之於潁州復敗之於正陽關餘賊掠舟適回六安甲三遂回軍勦毫蒙擒匪時擒首張捷三等糾合粵匪以義門集為總巢分踞雒河集臨湖鋪勢張甚甲三進軍擣臨湖鋪賊潰甲三遂進徧雒河集雒河賊已先期移踞趙旗屯將誘官軍入集而皮襲之且分股由河北斷官軍後甲三偵知之飭船隻盡泊南岸候補直隸州知州張家駒陣河干候補參將朱連泰李威虎等敗賊於馬家樓復迫之渦河殲賊殆盡

遂破義門集賊巢捷入得

旨嘉獎時永城賊為官軍所

敗由正陽掠舟回竄六安潁亳一帶賊尚縱橫

上以臨

淮為前路要隘

命甲三馳紮臨淮遏賊北竄四月奏陳

臨淮布置情形又疏勅護理廬鳳道立誠巧滑貪鄙劣迹昭著請革職提訊並獎勵督帶練勇首先殺賊立功之鳳臺縣練總王恩綬等均從之五月起擢都察院左副都御史六月

六安民團克復州城甲三疏請立

沛恩施並免糧賦其

捐糧助勤者優敘官職以資激勵如所請行特淮南土匪以俞家灣為巢穴七月甲三分兵進剿先敗其外援斃賊目史學江等旋徧賊巢百步為壘以大礮辟巢內屋壁賊亂我軍填濠入火之賊焚死者甚眾餘賊奪路走復追殲之擒賊渠李占青等四十餘人悉置諸法八月疏言見在兵勢分賊勢合惟有剋期

共舉塞江路據險要然後江南北同時進兵輔以民團兼散賊黨雖有一二死守之賊亦不難合力翦滅請

飭各統兵

大員併力合謀而以重臣統之以收指臂之效又言皖省軍務以克復廬州為最急壽定肅清附近無虞句結若出偏師赴南路斷廬賊接應不特廬南各屬可清且翦其逆黨即廬郡孤立臣已令紳民等密行糾約多備糧米即擬進駐六安

上

嘉勉之尋以粵匪陷和州窺江浦將北窺甲三奏請緩赴六安

遣參將吉連扼關山廬鳳道張光第赴淞河集團練為聲援

上是之十月以皖北賊復熾遣張家駒朱連泰等進軍蒙城敗蘇添幅等於寺覺集會粵匪由和含踞烏江一帶檄張光第與署按察使恩錫擊敗之甲三策賊必復來飭光第嚴防十一月賊果乘夜結五壘於駐馬河官軍乘賊營初立薄之擒殲無數

甲三復以桐城之賊恃大小關為固遣參將劉玉豹舉人臧紆青由六安進連奪兩關圍桐城廬江援賊乘夜大至復擊走之甲三恐孤軍深入無援奏桐城南連安慶西連潛山東連廬江我軍深入重地三面受敵即克復亦難為守臨淮復無兵可撥疏入

命提督秦定三由舒城迅撥兵勇為臧紆青等聲援尋臧紆青攻桐城西門安慶潛山援賊膚至城賊復分門出應之我軍三面受敵紆青力戰死劉玉豹方攻北門聞警赴援收合餘衆退保六安

詔嚴飭甲三及和春等撥兵策應以贖前愆五年正月甲三疏言廬州居江北腹地之中水陸四通賊又旁陷十餘州縣金陵資其挽輸安慶倚為後應廬州不克不特江北各路防兵為所牽制楚師東下亦不能急擣金陵請飭曾國藩等以水師逼安慶陸軍由北岸掃太宿潛山而以勁

旅出賊後先克廬州由北而南取舒桐趨安慶並逼江岸直下金陵可無後顧旁觀之憂報

聞二月疏籌全皖軍務分

東西中北四路畧曰北路以臨淮為要正陽次之臣駐臨淮牛鑑扼正陽聲勢聯絡可無虞賊北渡廬州中路臣所以請先克廬州者蓋廬州一克無後顧之憂各路防兵皆可前進廬南各州縣不攻可下無如和春福濟師老力疲急難奏效西路蘄黃無處非賊兵力過單終屬無濟東路沿江鉞魚嘴西果山一帶賊船賊壘來去無常雖有張光第等分軍進攻而水師不能夾擊終難蔽事刻下楚賊力爭江路驍悍必盡聚上游廬州機會誠大可乘請益厚兵力分扼廬城東南或添兵並勦舒巢使其應接不暇自可一鼓成擒矣尋疏請將宿州知州郭世亨開缺辦理軍務而以王啟秀代之

命與和春福濟妥商具奏

甲三輒再疏言之

諭曰朕以調署牧令必須與督撫會

銜並非不准袁甲三與聞舉劾乃閱另摺覆奏祇稱往返函商仍未聯銜具奏袁甲三著傳旨申飭仍著福濟會同和春袁甲三詳細酌奪辦理和春福濟遂疏劾甲三堅執已見無從會銜並劾甲三株守臨淮粉飾軍情擅截餉銀冒銷肥己等款得

旨袁甲三先行交部嚴加議處即來京候旨至擅截餉銀冒銷肥己等情著和春福濟確查具奏尋議革職五月甲三遣丁赴都察院呈訴被參摺內所稱擅截餉銀等情為和春等所誣緣上年桐城之役事後曾函責和春等置不應援本年復以廬州未復兩次具奏和春等銜恨遂捏造蜚語誣參請奏明查辦都察院以

聞

命下兩江總督怡良秉公查辦怡良

覆奏入事獲雪是年亳州擒匪張落刑宮得韓狼子句結河南

擒匪蘇添幅王貫三等踞雒河集四出焚劫給事中孫觀御史
曹登庸宗稷振先後疏言甲三在臨淮勦辦有方地方藉以安
謐自離任後擒匪大肆蹂躪請仍起甲三視師怡良及江蘇巡
撫吉爾杭阿浙江巡撫何桂清復交章薦六年二月 命
甲三隨同英桂勦辦河南擒匪時張落刑等分踞鳳潁徐州各
境圍亳州陷懷遠蒙城夏邑虞城犯歸德府江皖豫三省之兵
屢挫甲三至軍即合南陽鎮總兵邱聯恩大名鎮總兵史榮椿
等擊之三戰皆捷會甲三之子編修袁保恆集舊部三千人至
軍遂力解亳州之圍進戰於翟村寺北復大敗之斃賊四千餘
張落刑等糾蒙城悍黨於白龍王廟據險為寨悉力拒守官得
王貫三為之援五月甲三會邱聯恩河北鎮總兵崇安馬步併
進已革察哈爾都統西陵阿與保恆以馬步隊沿河襲之殺賊

數千平其寨乘勝攻燕家小樓賊黨數萬列長陣以拒我軍衝
其中堅貫賊陣賊大潰遂乘夜疾進破趙旗屯穆家寨沙土集
越日抵雒河賊憑壘力拒槍礮雨注官軍齊力併攻毀其南岸
土牆擁而入逆破賊巢窮追四十餘里獲蘇添幅等張落刑僅
以身免捷入得

旨袁甲三自永城亳州急抵雒河集賊
巢督陣推堅累戰皆捷洵屬懋著勤勞著以三品京堂候補時
張落刑既而走徐圖復逞七月踞三河尖尋犯潁州甲三敗之
於大橋口賊北走北路官兵不能禦賊遂復踞雒河集甲三督
邱聯恩等擊賊於大清宮又敗之於十八里鋪殲王貫三七年
四月以另股擒匪分踞王鄧諸圩深溝高壘伏匿不出甲三檄
史榮椿等誘賊敗之進攻王圩賊冒死出突官軍蹙之入林一
炬殲焉五月督諸軍填濠進築礮臺臨圩中如指掌賊窘急殊

死守鄧圩賊來撲擊卻之遂火王圩薄鄧圩築長濠困之是月授太僕寺卿六月分兵拔宋圩鄧圩以糧盡內訌縛獻首逆李寅等百餘人鄧圩平姚圩亦旋破奏入

上以甲三勦撫

兼施調度有方

賞戴花翎七月副都統銜勝保攻張落

刑於正陽關久不下奏請甲三移師助勦甲三遂檄朱連泰署徐州鎮總兵史榮椿留勦敗匪之路韓圩者九月克韓圩十月粵匪李秀成圍河南固始縣甲三偕勝保赴援八年二月固始圍解遂進攻六安復之五月擒匪由東路擾銅山逼徐州飭史榮椿擊走之擒斬巨匪孫大旺於睢寧縣泥溝六月宿南賊踞王家圩甲三自正陽移軍宿州檄知府徐曉峯乘夜襲之殲賊首王紹堂等乘勝復七圩七月

命代勝保督辦三省勦

匪事宜時張落刑襲破陳家莊分踞各圩甲三分兵擊走之八

月擒匪李大喜糾羣賊由懷遠北犯正紅旗蒙古副都統伊興
額逼賊於蕭縣失利賊陷豐縣甲三遣兵復其城令徐州鎮總
兵傅振邦繞出賊北截擊之十月賊南趨銅山之孫家集傅振
邦率馬隊追勦適保恆與知府李榮等以步卒至合擊敗之賊
西竄甲三敗之於褚莊又敗之於木牌坊尋蒙毫賊竄歸德府
甲三令保恆偕傅振邦以馬隊馳援賊聞風遽趨西北逼近開
封省城震動甲三以賊窺周家口已久其向西北者特為牽制
官軍計乃檄傅振邦等疾馳八晝夜及賊於太和之李興集保
恆豫糾各團迫賊於橋口傅振邦督馬隊分三路進保恆督兵
圍張兩翼策應遂大破之追奔四十餘里斃賊數千豫境肅清
河南巡撫恆福奏入 賞保恆伊勒圖巴圖魯名號餘各
賞賚有差是月疏陳統籌全局畧言兵分則勢孤合則勢盛張

宮等逆踞地千餘里奸徒附和良民被脅賊圩遍地一氣相通東可以擾清淮西可以犯歸陳北可以窺山東若連粵逆為害更甚臣所統兵勇除各處留防外不過數千僅能為應敵之軍不能制賊死命東豫各省防兵零星分布與其畫界散處終歸無濟曷若併力大舉迅圖成功請飭各督撫合力規籌與臣軍聯絡一氣進逼賊巢為掃穴擒渠之計報

開九年正月

檄協領關保遊擊滕家勝等擊張落刑於草溝破其巢追至沱河賊溺死者無算越日復追擊於雙渡口張落刑僅涸水免遁奉諭曰袁甲三督辦三省勦匪事宜已逾半載但知防堵徐宿不能直搗賊巢日久遷延迄無成效著即來京供職甲三遂請假省親禹州四月到京旋命以三品頂戴署漕運總督時科爾沁親王僧格林沁在天津海口擊退夷船軍威

方振甲三與河道總督慶長奏陳通籌南中軍事亟須添派重兵合力大舉請

特簡親信知兵重臣如僧格林沁者乘此夷人被創之後暫為移緩就急之計酌撥馬步大隊數千統帶南來節制各軍迅速兜剿以期掃除南賊即以廓清北路報聞十月勝保以母憂解任甲三接署

辦皖省軍務旋實授漕運總督

欽差大臣時賊踞臨淮關跨兩岸為壘甲三以援賊皆自鳳定而來其火藥糧米亦取給於鳳定非斷其糧道絕其外援關不可拔及築營於關之西南扼要處賊屢出撓我軍且築十一月營成乃進圍麇戰月餘先破南岸賊巢北岸之賊爭棄械乞命甲三以其抗違日久令自七十以下十五以上盡誅之北岸賊數千亦無得脫者生擒偽翼天侯顧大胤等遂克臨淮關移師進擣鳳陽十年正月

督馬步軍薄城下鳳陽府縣兩城相距三里甲三併圍之屢戰
屢捷軍威大振賊目鄧正明潛詣軍前乞降甲三密遣總兵張
得勝誘首逆張元隆出斬之鄧正明等益震驚縛獻偽丞相張
先等十四人遂復府城縣城猶未下以大礮擊之擒斬乞援之
偽軍師趙玉奇賊登城環跪乞命賊日常四邵殿倫等出降縣
城亦復甲三於城外別築七營驅兩城降賊入擇尤悍者三百
餘人誅之餘悉遣散捷

聞

上以甲三疊次克復

城池調度有方

賞穿黃馬褂鳳陽既定飭江南提督李

世忠擊濶溪賊巢克之先是保恆隨甲三至京遂留京供職二

月命保恆赴甲三軍營差遣是月擒匪陷清江浦甲三

恐賊犯山東檄道員張學醇等軍出賊前破走之遂復清江浦
尋粵賊由廬州襲滁州李世忠擊走其衆賊退保全椒復乘勝克

之降賊黨二千得

旨嘉獎三月粵賊陳玉成由和合復

撲全椒分擾滁州甲三撤粵世忠等解滁州之圍奪大橋草茅
嶺諸賊壘乘勝抵全椒城下內外夾擊盡毀賊營陳玉成遁甲
三移軍攻定遠連挫賊鋒壁城下五月賊乘李世忠勦古城土
匪陷來安縣甲三責李世忠即圖收復數月乃克之時金陵官
軍潰將軍和春提督張國樑等戰歿江南州縣盡陷甲三飭道
員徐曉峯九江鎮總兵黃開榜督水師嚴防高寶諸湖賊不得
渡六月 文宗顯皇帝三旬聖壽 賜甲三母郭氏

懿槩頤齡匾額及福壽字如意綢緞等七月以定遠未下檄張
得勝副都統花向阿合保恆之軍圍之連戰皆捷奪賊壘十七
復於城東北築礮臺擊之八月陳玉成糾金陵大股來援力戰
數日會粵捻合撲鳳陽據九華諸山連營數十里城中食盡甲

三督諸軍屢戰圍不解遂令張學醇督參將黃國瑞以銳卒四百夜銜枚薄九華山賊營躍而入槍礮齊發賊爭潰走城上發巨礮應之賊愈亂同時棄營走鳳境以清是年秋夷人犯順甲三奏請勤王拜疏後即遣鑲藍旗漢軍副都統穆騰阿率張得勝先發將自督後隊繼進

上以臨淮為南北鎖鑰飭甲

三仍留鎮守甲三再疏請行又

詔止之尋夷人就撫甲

三疏言 國家於逆夷不得已而議撫非本意也賊情叵測後

患方長卧薪嘗膽當在此時因陳四策一曰慎采納津沽構釁以來亦嘗屢戰屢敗之矣近之失利非我忽怯夷忽勇也祇以宜戰宜和左右本無定見即若迎若拒將帥無所適從夫戰不勝則和難久雖權時言和亦必終歸於戰從古如斯也是在聖明獨斷不為眾議所搖然後人得堅敵愾之心轉弱為強矣一

曰節靡費 京師旗綠各營歲靡帑數百萬不足以贍而未嘗
可用也夫游手者得以坐耗則敢戰者疲於不飽請釋其不願
入伍者聽自謀生而特選精銳三四萬優其糧餉專習戰守則
兵可用而費亦節矣一曰精訓練旗丁以操演為具文雖健銳
各營號稱嫺熟亦臨敵而靡以兵未歷行陣而將統領不常也
若於京營中擇其精壯者若干人分置各路軍營俾資歷練定
限換防久之則摧堅陷陣皆視為故常然後擇而任之使處於
其職以期兵將相習庶幾戰克守固矣一曰選將才練兵必先
擇將夫不試之於平日而欲責之於臨時用人者既將就而不
暇擇任事者亦竭蹶而不敢辭此兩誤也請 飭下各路

統兵大臣擇其素經戰陣能得兵心者各保數人以備選擇庶
幾羣策羣力緩急足恃矣奏入

上嘉納之下行營王大

臣諫行時

駐蹕灤陽十二月甲三疏請還京謂

行殿蕭條非森嚴之體天時寒沍非調衛之宜且夷人在京距
灤陽僅三百餘里萬一夷衆數百人北踞關隘

詔書不

得下速疏報不得上通天下洶洶何所屬望疏入報

聞

十一年四月遣張得勝等破泗洲靈璧之賊張落刑方糾衆屯
聚渦河之北甲三遣李世忠擊走之九月奏道員甘心叛逆請
急派兵進討

諭曰苗沛霖以生員辦理團練受

皇

考厚恩四年之間擢任道員

記名鹽運使

賞布

政使銜並

賞花翎勇號該員宜如何感激圖報乃因所

部練勇被害糾衆圍攻壽州

皇考不加譴責諭令袁甲

三秉公查辦迨經翁同書查明起釁根由將徐立壯正法孫家
泰於監禁後旋亦畏罪自盡該員自己無可藉口乃圍攻壽州

之練不即撤退復遣其黨苗金開等竄擾河南日形跋扈茲據
袁甲三奏該練圍攻壽州愈急並令死黨張士端等踞守懷遠
抗拒官兵且受粵逆偽封逼令練衆蓄髮四出搶掠其為甘心
謀逆自外生成萬難寬貸四川北道苗沛霖著即行革職拔
去花翎撤銷勇號即著袁甲三督同李世忠調派官軍會同賈
臻田在田嚴樹森毛昶熙等各路兵勇奮力追剿以伸國法各
路帶兵大員祇將逆首苗沛霖擒獲盡法處治其餘黨與如自
投來歸概免究辦其從前立功得有官職者亦各照舊如能縛
獻首逆或能隨同官軍勦賊出力仍當優加獎勵並著袁甲三
等曉諭各該練衆人等知之甲三遂檄李世忠等援壽州世忠
等軍未至壽州四十里沛霖已陷壽州甲三自請嚴議得
旨寬免嗣以安徽巡撫翁同書逮問甲三亦下部嚴議沛霖之

入壽州也翁同書奏稱沛霖並未滋事害民祇求辨明心蹟
詔甲三罷攻懷遠適張落刑復率大股將由長淮衛渡淮而北
甲三遂移軍擊之落刑敗走甲三駐軍長淮衛解散苗沛霖脅
從諸圩先後反正者二百餘圩十一月保恆及張得勝等襲定
遠定遠賊懾於軍威無同志甲三復縱閒搖之保恆等抵城下
賊即棄城走追殲殆盡遂克定遠捷入 諭欽保恆戰績毋
引嫌甲三奏保恆隨營藉資閱歷不當與將士爭功 特旨
賞保恆遇缺題奏十二月粵匪由和舍窺滁州甲三檄李世忠
等軍分三路擊敗之進剿六合陣斬悍賊馮真林賊驚潰遂拔
六合 上以甲三調度有方下部優敘尋乘勝克天長縣同
治元年正月移軍攻克江浦縣及浦口鎮復下部優敘四月粵
匪犯六合檄李世忠擊敗之賊犯滁州來安復敗之特陳玉成

久踞廬州甲三飭張得勝總兵徐鵠副都統克蒙額等會將軍多隆阿之軍攻之張得勝設伏北門外誘賊出戰賊大敗遂薄城下賊分門出戰諸軍合擊賊又大潰我兵乘勝逾城濠入遂克廬州陳玉成率死黨突走壽州沿途被官兵追殺及落肥水死者無算苗沛霖開城納陳玉成甲三及多隆阿索之急沛霖乃執玉成送勝保軍前六月甲三因病請假七月以病勢增劇疏請開缺回籍調理 允之並 諭曰前因壽州失陷袁

甲三與翁同書共辦一事且有督辦軍務之責降旨交部嚴加議處惟念該大臣督辦安徽軍務三載時值艱危竭力支持一切尚屬穩練該部所議袁甲三應得革職處分著加恩寬免甲三行至歸德疏陳四事一 聖學之緩急宜權一議政之精力宜專一用人宜審一聽言宜斷 上嘉納焉時楚師攻克

安慶僧格林沁亦連破捻衆聲勢赫然苗沛霖懼退出壽州正陽為乞撫緩兵之計十一月甲三奏言苗練終難就撫萬不可再令其厚集財力占據上游形勢二年三月苗沛霖果復叛甲三奏宜亟乘其初起迅圖勦辦以遏凶鋒而定人心並飭當事諸臣此後毋得再及撫之一字則奸人氣折士志益堅矣疏入命甲三在籍會籌防勦甲三疏請調吉林黑龍江馬隊並請飭山東河南練步卒備會勦允行五月苗逆圍蒙城斷官軍糧道詔甲三急籌接濟甲三乃倡捐餉需募敢死士由閒道解至蒙城尋苗逆復陷壽州捻首張總愚等犯陳州甲三遣軍擊敗之時蒙城被圍久甲三疏言蒙圍非尋常比救蒙之軍亦非尋常行軍比請飭僧格林沁急趨蒙城曾國藩迅攻壽正唐訓方迅攻懷遠使苗逆專力自顧不暇旁擾

庶可挽回大局六月擒匪再犯陳州甲三擊走之時甲三病已
亟猶日召將士議戰事是月事

三老成正直強毅有為蒙

先皇帝特達之知裨以欽差

大臣關防自捻逆縱橫皖豫數年統軍淮甸擒滅張元隆等巨
股疊次克復鳳陽府縣各城勤勞懋著備歷艱難前在臨淮軍
營積勞致疾時值苗逆復叛以該漕督矢志滅賊本籍陳州毗
連淮潁復諭令在籍督率兵團兼籌防勦猶能籌餉籌兵悉心
捍禦前據奏稱沈疴未愈又復疽發於背方冀調理就痊堪資
倚畀茲聞溘逝念其力疾籌防歿於王事披覽遺摺悼惜殊深
袁甲三著照漕運總督軍營病故例從優賜卹歷任一切處分
悉予開復應得卹典該衙門察例具奏伊長子前詹事府右庶
子袁保恆著俟服闋後以翰林院侍講學士即補次子舉人袁

保齡著賞給內閣中書用示篤念蓋臣至意尋 賜卹如例

予謚端敏八月大學士湖廣總督官文疏陳袁甲三治軍堅苦
狀 詔於陳州建立專祠將歷任事蹟 宣付史館三年

三月安徽巡撫唐訓方奏請於臨淮建甲三專祠七月漕運總
督奏請於淮安建甲三專祠均 允之旋因兩江總督曾國

藩等遵查孫家泰等死狀 上以甲三辦理未善撤銷臨淮

專祠四年曾國藩暨安徽巡撫喬松年復據安徽全省紳民以

甲三統兵淮甸清廉勤苦有拊循保障之功至今遺愛在民奏

入 特予給還尋河南巡撫張之萬題請入祀河南鄉賢祠

江蘇巡撫李鴻章題請入祀淮安名宦祠均 允行子保恆

道光三十年進士詹事府詹事保齡同治元年舉人內閣中書

以待讀儘先升用

國史館原傳

袁保恆河南項城人父甲三漕運總督自有傳保恆道光三十年進士改翰林院庶吉士咸豐二年散館授編修三年請假送親回籍尋赴安徽隨甲三行營勦賊五年

上允甲三請留

保恆於軍六年擒匪張落刑竄踞潁上甲三統豫軍防潁州府城保恆督隊斃賊甚衆七年

欽差大臣勝保奏言保恆

隨甲三軍解亳州圍拔白龍王廟寺兒集雉河集賊壘奮不顧身所向克捷甲三引嫌未為請獎本年進攻三圩保恆在礮臺晝夜督戰不少卻實為始終奮勇請予鼓勵得

旨賞侍

講銜花翎八年十月安徽懷遠擒匪李大禧糾衆圖北犯壘為官軍所創竄孫家寨官軍馬隊由銅山追賊南下保恆率步兵由潘家屯楊莊一路會勦擒斬數十奪其輜重十一月統宿營兵勇取道永城迎勦擒首孫葵心劉狗等賊旋自陳州撲周家

口北岸保恆督馬隊馳至鹿邑與大軍會追賊八晝夜及於大
和大破之河南肅清 賞伊勒圖巴圖魯名號 上

批答甲三疏有汝子奮勇衝鋒甚屬可嘉之 諭九年正

月隨甲三奉 召回京七月充 文淵閣校理八月充順

天鄉試同考官甲三以漕運總督再出視師十年三月

命保恆仍赴軍營聽差遣六月督馬步隊會西路師逼攻定遠

累捷幫辦軍務穆騰阿移文甲三欲上其功甲三婉辭不可乃

疏言世受 國恩捐糜難報衝鋒冒鏞皆分所當為且臣子年

力富强必使盤根錯節藉增識力方克成有用才不敢與將士

爭爵賞之榮也 上諭甲三嗣後該員著有功績亦應實

敘不必引嫌十一年九月叛練苗沛霖圍壽州其黨張士端等

踞懷遠築壘渦河口以阻官軍保恆統精銳五千人攻之破其

壘十月邀擊懷遠叛練擒斬頗多十二月會攻定遠克之

命遇翰詹應升缺出開列在前同治元年五月擢翰林院侍講
八月轉侍讀閏八月遷詹事府右春坊右庶子時甲三病篤得
請解職

詔安徽巡撫李續宜領其軍保恆留營尋丁繼

母憂歸二年四月河南巡撫張之萬調保恆赴汝甯軍
上可其奏既因陳州接壤安徽賊氛尚熾

命甲三督飭
保恆聯絡團練防勦六月甲三卒
上悼惜賜卹有加

詔保恆服闋後以翰林院侍講學士即補時皖北初平保恆以
江淮之民輕死好亂宜有以善其後策久安也疏宜次第舉行
者八條一僧格林沁不宜輕離皖北待伏莽淨盡人心大定然
後撤防一皖民不知畏官宜慎選守令假以事權僧格林沁總
其成而不侵其官使得自行其威信一皖北地勢遼闊宜增置

濬使官民日近政教易施奸慝易誥一江淮之民讀書明理者少平日以重然諾輕生死為義宜廣設義學以化獷悍之習革闕很之風一淮南北自粵捻各賊蹂躪之後逆產絕產縱橫千餘里有主之田不及半宜查勘歸官募民屯墾方五百里可得田二千餘萬頃每頃養八口之家出屯兵一名可得強兵二十餘萬設屯衛之官綜理而訓練之以資鎮守備徵調不費一餉而坐收富強之效萬世之利中原之福也一宜整頓兩淮鹽務以濟兵勇糧餉為屯田經費一近日勇多兵少每糧輕而勇糧重兵有定額勇無定額宜裁勇增兵一勇之費可養二兵一兵額倍平時猶較養勇為省將領滑輒則盡拔帶勇之得力者破格而補營官老弱不齊則盡拔練勇精壯者隨時而補額兵完事定後兵可歸伍而勇難遣散此尤不可不深慮而豫為之

地也一河南歸德鎮距省會及徐州鎮皆三百餘里而距壽春鎮獨遠壽春距南陽鎮尤遠非所以資控制也宜於臨淮添設一鎮而移壽春鎮於潁霍以控淮河上游使稍近南陽再移歸德鎮於蒙亳之間以制其要害更設提督統轄之使毋分畛域時江蘇巡撫李鴻章偕夷兵克復蘇州省城保恆因奏言夷人貪而無親垂涎財賦之區欲坐收其利非真能敵愾效順也請密飭諸臣籌處置之法嚴夷夏之防又密陳提督李世忠驕恣難制請

寄諭僧格林沁曾國藩等謀裁抑之三年保恆

以前所條屯田議未即行再疏力言興屯不可緩請躬詣京師與廷臣面議

上以不候督撫覆奏輒以未見施行為詞

責其自信過深不諳體制下部議處四年正月部議降一級以鴻臚寺少卿候補尋服闋先是前任順天府府尹蔣琦齡上中

與十二策稱保恆嫻武備十一月戶部尚書羅惇衍疏論人材亦以保恆在軍久武事諳練請

畿輔四月

詔責湖廣總督李鴻章等滅賊保恆以皖豫

各軍半甲三舊部習同甘苦自請效力戎行以竟父志得

旨發往李鴻章軍營差遣委用六月大軍敗賊於商河賊首張總愚率衆東走保恆帶小隊出德平義渡口擒騎賊數十諸將畢會逼賊於徒駭河盡殲其衆擒匪平捷入

上以保恆

冒暑督隊追念甲三功嘉保恆能勉承父志開復降調處分仍以翰林院侍講學士補用並予三品銜八月

命赴陝甘

總督左宗棠軍營聽候委用九月補官八年

命筦西征

糧臺得專摺奏事十一年五月擢詹事府少詹事十月遷詹事十二年請假省親旋因肅州克復

賞頭品頂戴十三年

二月升內閣學士兼禮部侍郎銜八月大軍出關 詔左

宗棠督轉餉以保恆為幫辦進駐肅州九月擢戶部左侍郎兼

管三庫事務十月 慈禧端佑康頤皇太后四旬萬壽

賜保恆祖母郭氏扁額如意文綺光緒元年三月奉 召回

京八月兼署吏部右侍郎二年四月調刑部左侍郎九月充順

天武鄉試正考官十二月疏言臺灣僻處海濱物產豐饒民番

逼處非專駐大臣鎮以兵威孚以德意舉民風營制吏治鄉團

事事整頓未易為功若以福建巡撫半歲駐臺恐閩中全省之

政務道里懸隔而轉就拋荒臺灣甫定之規模去住無常而終

為文具請改福建巡撫為臺灣巡撫駐臺灣而以總督辦福建

全省事各專責成疏入下部議行三年五月請假歸葬祖母郭

氏八月回京是歲河南旱飢人相食

上以賑荒遲延褫巡

撫李慶翱職

命河東河道總督李鶴年權代之十月遣保

恆幫辦賑務保恆因奏河南被災至廣需款至急擬借各直省存公閒款及富商銀錢俟歲稔開徵提還下戶部議既至疏陳沿途流民狀四年正月偕李鶴年奏截留江安漕糧九萬餘石不許請借直隸平糶餘米三萬石許之又請借用江蘇義倉積穀及臺灣捐修鐵路洋銀五十萬圓下所司議奏保恆復疏言賑款遲到一日即多斃無數窮黎乞特詔允所請並自陳

籌措無方請治罪謝災民報

聞尋以戶部議覆保恆借款

疏

飭河南布政司權歲徵出入除河工兵餉及京餉協餉

能劃若干還借款保恆偕鶴年疏言豫省田賦歲收僅二百餘萬兩撥解京協各餉在常已不支今蒙特恩蠲緩除本省

用款所餘無幾非停解京協各餉十年不足補因災入之正

供清因賑多出之借項但各餉既難久停而又無指定可望之
的款則歸還不能豫必恐疆臣躊躇而不敢輕諾富商亦觀望
而不能勉從數百萬生靈何能以空言果其枵腹救荒如救焚
拯溺失今不救將有不勝救不及救者當此財力艱難求無礙
全局又於還款能見信者惟有緩禁川鹽行楚加抽鹽釐備抵
賑需為兩全之計時川淮鹽商爭行銷楚岸疆吏相持不能決
川鹽本輕運便獲利三倍於淮保恆故請重取川釐俾資本過
淮商為漸復淮鹽之地疏入下部速議保恆自至河南通飭各
屬查災籌恤委員履勘收成被害分數詳查逃亡戶口取結造
冊飭民間公舉紳耆辦賑刊發章程二十二則以飢民過衆就
孔道添設粥廠復以書抵鄰省督撫請戒所屬收養豫民流入
境者因東南境得雪頒補種春麥法勸殷戶出種以貸復遣員

四出導民開土井行區田春久不雨步禱各祠廟累月四月得雨將倣裝周歷災區疾作三日卒鶴年上其狀 諭曰刑部

左侍郎袁保恆由翰林游擢卿貳前在江蘇安徽等省隨剿擒匪疊著戰功嗣赴陝西辦理轉運事宜俱臻妥協此次派往河南幫辦賑務尤能任怨任勞悉心經畫遽聞溢逝軫惜殊深著加恩照侍郎例從優賜恤任內一切處分悉予開復應得恤典該衙門察例具奏伊子袁世勳俟服闋後由吏部帶領引見尋賜祭葬 予謚文誠九月河南巡撫涂宗瀛奏言豫省去歲奇災司庫罄懸如洗故刑部左侍郎袁保恆奉 命抵豫屏絕供張服食麤糲籌款釐弊昕夕焦勞凡有可騰挪之法無微不至按凡有可利濟之事無艱弗任臣嘗見其奏牘暨與各省乞貸書不啻聲淚俱下維時各屬流民就食省關各廠日十數萬

保恆創立規制全活無算復以時巡視各粥廠雜處吏胥開拊
循指示不憚穢惡不避風雨諸弊以絕而身則兀瘁矣當其未
病嘗自為文告神願以身代民歿卒之日婦孺皆為流涕盡瘁
王事宜隆報饗請於河南省城建祠命地方官春秋致祭又言
保恆世濟忠勤前典從兄保慶同辦歸陳團練地方賴其捍禦
請附祀陳州府甲三祠均從之尋允安徽巡撫裕祿

請以保恆附祀甲三臨淮祠子世勳員外郎

國史館原傳

儒林

周

陳亢字子禽一字子亢陳人敬王己丑年生少孔子四十歲其兄子車死於衛子車妻與其家大夫謀以殉葬亢曰以殉葬非禮也雖然則彼疾當養者孰若妻與宰得已則吾欲已不得已則吾欲以二子者之為之也於是弗果用嘗問伯魚曰子亦有異聞乎伯魚告以聞詩聞禮亢退而喜曰問一得三聞詩聞禮又聞君子之遠其子也今陳州府太康縣北二十里有子禽墓唐封穎伯宋加封南頓侯自明嘉靖以後定稱先賢

陳學

漢

蔡玄字叔陵汝南南頓人學通五經門徒常千人其著錄者萬六

千人微辟並不就順帝特詔徵拜議郎講論五經異同甚合帝

意遷侍中出為弘農太守卒於官

後漢書儒林傳

蔡衍字孟喜汝南項人也少明經講授以禮讓化鄉里鄉里有爭

訟者輒詣衍決之其所平處皆曰無怨舉孝廉稍遷冀州刺史

中常侍具瑗託其弟恭舉茂才行不受乃收齋書者案之又劾

奏河間相曹鼎臧罪千萬鼎者中常侍騰之弟也騰使大將軍

梁冀為書請之衍不答鼎竟坐輸作左校乃徵衍拜議郎符節

令梁冀聞衍賢請欲相見衍辭疾不往冀恨之時南陽太守成

瑁等以收糾宦官考廷尉衍與議郎劉瑜表救之言甚切厲坐

免官還家杜門不出靈帝即位復拜議郎會病卒

後漢書黨錮傳陶潛四

八目引三君八俊錄時人語曰天下雅志蔡孟喜

五國

程秉字德樞汝南南頓人也逮事鄭玄後避亂交州與劉熙考論大義遂博通五經士變命為長史權聞其名儒以禮徵秉既到拜太子太傅黃武四年權為太子登聘周瑜女秉守太常迎妃於吳權親幸秉船深見優禮既還秉從容進說登曰婚姻人倫之始王教之基是以聖王重之所以率先衆庶風化天下故詩美關雎以為稱首願太子尊禮教於閨房存周南之所詠則道化隆於上頌聲作於下矣登笑曰將順其美匡救其惡誠所賴於傅君也病卒官著周易摘商書駁論語弼凡三萬餘言

三國吳志

明

本傳

王廷諫字信卿號青蒲其先山東新城人也明弘治中遷項遂家焉父三德恂恂有古君子風尤雅重讀書廷諫生而穎異方

夬時喜弄書十歲能屬文十三就童子試即為多士冠補弟子
員有司稱為賈太傅再出焉二十七登賢書戊戌聯捷成進士
鄉會俱第十一名次年授內黃令平明廉察聲名藉甚甫一載
移調滑縣滑古要會地也軍悍民刁廷諫至興學校清軍餉詰
憲刑暴吏不容奸人懷自勵政治肅然綸音褒獎將超擢內用
以賦性剛介恥事干求遂左遷留都外翰拂衣歸猶未及強仕
也杜門謝交公庭絕迹布素蔬食淡而不厭邑大夫造其廬蒼
鳳翔千仞不可及至於鄉人士處則光風霽月雖三尺童子皆
知頌盛德焉子父先意承志定省未嘗或怠弟廷佐无妄罹於
辟多方脫之嚴於課子寒暑弗輟子六人皆有聲藝苑為中州
名士築雪蕉鏡中二園著作其內暇則為詩詞與邑賢相倡和
著詩經捷解四書口說七子文華圖南草若干卷學者宗之年

八十有一卒於家長子士忠崇禎乙亥選拔孫啟明髫年膺順治甲午鄉薦

李行志字仲升號鵬南先世懷慶修武人明正德中始籍項城賦質魁梧天性樸厚幼好讀書足不履戶外偕兄尚志受業天中彭先生門學成淵博有聲士林萬厯己酉舉於鄉癸丑成進士厯任登萊兵備副使晉大參所在政績足紀居鄉篤孝友敦齒讓恤窮賑窘獎進後學出於至誠註小學忠孝經女誡尤精聲韻之學著字音彙切韻發微等書行於世

國朝

黃載字載公前明周定王裔明亡變姓為黃先時自開封徙洧川封邱聞寇變後家於項入衛輝府學後改隸開封府歲薦明經篤嗜正學雖流離患難中未嘗釋卷亂後耕硯為業門下桃李

崢嶸境約澹如也與弟輔相友愛家庭雍睦持己接物端謹謙和然無世俗阿媚態曾與睢州湯潛庵柘城竇敏修同受業容城孫徵君先生得良師友講論益明濂洛心傳沛縣閻古古封邱杜士林鄆陵梁曰緝暨同邑諸名士皆高其為人相與往來贈答稱心友焉弟姪子孫輩多有聲庠序無少長皆循循雅飭足見儒者之家教矣

閻銑字蘆甫少年倜儻負奇姿讀書淹貫經史盱衡古今事變可
否得失不啻燭照數計制舉業亦高古軼羣以歲貢司獲嘉鐸
教士有法成就甚衆著周易正解未卒業以疾歸里尋卒生平
非公不至立身孝友居家儉樸邑人尊為松庵先生

閻潮字公融號友峯明安邑主簿廷梧五世孫也幼從堂伯松庵
先生遊既冠偕弟濤閉戶攻修精詩古文詞康熙甲子中副榜

秉鐸偃師濤亦成增生丁內艱服闋不甘仕進以著述為務松庵先生周易正解僅著上經而卒潮因續成之著端操堂文集子枋弱冠補增生姪渠雍正己酉選拔可以見家教矣至故事二親敦睦同氣卹戚黨和閭里懿行尤難殫述

以上舊志

樊執中字聖傳號敬亭又號迂村幼穎異好讀書不與羣兒伍稍長動靜語默悉若老成弱冠應童子試以第一人受知邑侯滇南錢公旋食餼尹博陵中丞觀風得執中文極推賞命肄業絃歌書院院長兆松岑先生郡守長白金公皆器重之時臬憲沈公提調書院以昌明道學自由是究心濂洛關閩之旨蒙沈公稱許再四乾隆辛酉列選貢在省垣與湯大山定交文正公曾孫也叩其家學因得讀文正公與夏峯諸書嘗曰自與湯君交受其薰陶而飲食夢寐閒時若登夏峯文正兩先生之堂親

聆告語癸酉舉於鄉甲戌成進士候選在籍開館授徒多所成
就居恆布衣蔬食無異寒素鷺然自得不求聞達主上蔡書院
講席教人以踐履篤實忠惠廉節為主又以慎獨為切要工夫
作三約三戒以示諸生在上蔡五載多士景從後主講本邑蓮
溪書院四方負笈者益衆因材造就如不及乾隆庚戌九月十
二日卒年七十六先是七月十七日值生辰自題云數滿洛書猶
欠五壽追東魯已餘三至是無疾而逝適符欠五餘三之兆執
中退居林下近四十年讀書愈富窮理愈深養心愈純講學愈
篤學者翕然宗之而得其真諦者寥寥蓋其反躬自責己德因
年進獨知獨覺之地實非旁觀所能窺然即其抱道自重鄙迎
合揣摩為不屑亦足以勵士氣而厚風俗矣所著有古堂集日
省錄甲子年表歷藏於家

郭鶴齡字羽仙號頓南性孝友九歲遭父喪哀毀如成人奉母先
意承志藹藹孺慕母病焚香願天祈以身代遂愈事諸兄恭謹
析產取其荒瘠者夙債皆代償撫諸姪若己出讀書務精熟凡
五經四書諸說糾紛處參考精當發先儒所未發為文不求新
異清真雅正中自有卓犖之氣邑進士樊執中極器重之登乾
隆癸卯賢書數上春官不第里居授徒以敦倫立品為先講經
課藝至誠勤懇窮年不倦遇寒士不納脩資且助膏伙務俾有
成項沈淮商汝蔡之士多出其門著有夢覺一得錄易經集解
嘉慶甲戌選濬縣教諭焚香告父母以廉正修職自誓每月朔
望課士無異家塾革丁祭夙弊修聖殿學舍禮樂器皆煥然一
新濬令楊公重其品聘主希賢書院生徒百餘人講論不倦濬
自滑匪倡亂餘黨未殄上憲札令清查楊公求代籌方畧鶴齡

教以因正人引正人由正人別匪人力為經畫匪無適而民不
擾揚公德之奉檄宣講 聖諭鶴齡增講律例二條反側之
民一時盡安上憲極嘉其能以年老告歸濬人製錦祖餞唱和
贈答有黎陽詠歸集一卷歸里設義學從遊者益眾翟郡伯昂
親題教澤宏敷旌其門隱微自課嘗恐有疾比易簣猶口占數
詩以自責年八十四平生意辨欺慊願其堂曰四知示慎獨也
淮邑智君贈詩云知非尚友蘧君子好學返師衛武公可以見
其為人矣惜著述皆散失其所修族譜條例詳備可為世法家
規十條敬祖宗正倫理篤恩誼息爭訟務正業守勤儉教讀書
重慶吊尊古禮慎喪葬刊族譜中子原極聰敏六歲喪母能讀
祝文十五通五經手授理學宗傳望成大器甫授室而大鶴齡
為文哀之次子川邑庠生

鄧萬吉字蒨田性肫篤才思穎敏九歲隨父流寓息商閒厯經險阻艱苦備嘗比近年弱冠館附近劉君耀華家七年朝夕往還人未嘗見其旁視丁外艱哀毀踰禮竭力營葬服闋補博士弟子員旋食餼晝夜攻苦諸經皆手錄值秋闈無力不克赴親友集貲促往道經朱仙鎮夜宿旅店聞鄰家哭聲哀披衣起問該主人曰此上世亦讀書家今親老子幼貧不能養將鬻妻於商不忍離故舉家大痛且此婦甚賢孝可惜萬吉急令主人招其夫至解囊金盡與之勸謀生業以盡孝養其人拜受去明日束裝歸里家人咸尤之萬吉殊坦然次科乾隆癸卯舉於鄉四上春官不第授安陽教諭在任二十四年清操自勵教士以敦品飭行為先多所成就陞汝甯府教授未幾以年老告歸平生愛讀宋儒書擇要摘錄必求見諸躬行尤好孫夏峯理學宗傳自

書座右銘慎獨銘以自警學遠養粹未嘗有疾書遠邑終日處
生無惰容著有周禮擷要藏於家子玉幅字瑞房穎悟過人工
詩賦由拔貢中嘉慶甲子舉人大挑一等以知縣用遵父命改
就教職授陝州學正迎親就養厯調彰德汝甯府教授平生清
操自持取與不苟遇寒士曲加體恤餽遺從厚長孫伯橐優廩
生敦學勵品惜早歿次伯磊廩貢曾孫錫坤歲貢各有傳

黃甲字天一號雪莊性孝友端嚴少孤終身孺慕侍母疾湯藥親
嘗及沒哀毀骨立喪葬悉如古禮幼從兄學穎悟異常兒讀論
語孝弟章喟然曰不如此做去便是虛過一生九歲能詩弱冠
入邑庠旋食餼嘉慶戊午舉於鄉年六十三矣謁主考朱見庵
先生一見許為古道君子四上春官不第優游林泉以教讀終
甲通六經尤邃於易講學五十餘載惟以躬行實踐為期不專

事帖括業工書雖年逾七旬點畫不苟著有省克齋詩鈔雪莊文集課孫草教家格言藏於家

東紹珽字方貽廩貢明經冠林仲子進士存敬六世孫也生平品端學邃潛心伊洛之學不屑為章句俗儒家庭之內肅若朝廷族婦有欲觀劇者適見紹珽自外歸不敢往教人先德行後文藝沐其教者皆循循雅飭晚年閉戶攻修著性理真解行於世子愛棠庠生有父風

黃維庚字蘊輝庠生樊聖傳先生高弟也性澹泊不慕榮利惟嗜學如不及尤邃於易能發前人所未發聖傳與湯文正公曾孫大山往來講學維庚與有聞焉平生所學以不欺為主以格致為功以躬行實踐為要邑高氏望族也重其品學延課諸子十數年中入庠食餼登科甲者踵相接

高欽中字敬直弱不好弄髫齡就外傳戲題壁間曰心亘萬古始
為恆日月常懸晝夜明士心自有平生志江鳥那知得意鴻其
祖見之曰此兒稚弱而磊落非埃壚人也初受業袁端敏公於
案上得朱子全書閱之喜每日課畢篝燈讀達旦自是一言一
動若植規矩十六入邑庠十七食廩餼二十二列道光丁酉拔
貢隨父麗水縣任庚子歸應本省鄉試晤邑廣文王淡泉先生
鈐先生嘗與李丈清公倭丈端公講學京師一見大悅授宋元
明諸儒集因灑掃一室靜坐讀書五閱月閒從淡泉質疑辨難
語詳劄記中回浙置一冊有所得書之曰健復錄曰居甌隨錄
尋父歿永嘉任扶匱北旋因先後交代復留杭半載哀毀之中
益刻志讀儒先書每徹夜挑燈坐忽悟大易生生之旨欣然曰
天地之大德曰生與告子主氣言者迥別在天曰命在人曰性

在心曰仁無二物也以詩自記有從今打破生關去生意縣縣子細尋之句嗣讀儒先書若合符契無阻滯矣抵家杜門卻掃彌自奮發每慨淡泉云亡無可過從者乃延淡泉姪紹陽明經課弟及諸子讀己酉領鄉薦謁李文清公於河朔庚戌聯捷成進士觀政吏部分考功司與李觀庭楊蘭士陳杏江以道義相切磋時從倭文端公遊證所學咸豐改元 詔求海內直言

擬疏陳時事十餘條未及上會粵逆寇金陵豫省盜起念母春秋高不克迎養乞假歸省旋以墜馬折右臂益無意出山惟日侍親庭承色笑暇則手周易一卷課子弟讀袁端敏公招赴臨淮軍不應鄭小山方伯邀辦豫省捐輸不應王青崖方伯延主講西華演疇書院設帳箕子殿側嘗謂商周之際道在箕子洪範一書傳心之旨若揭因鐫一冊以五事貌言視聽思為檢身

之要而以三德沈潛剛克高明柔克平康正直為克治存養之方居兩載從遊日衆以教匪王廷楨擒匪陳大喜相繼倡亂邑南辭館歸為守禦計編保甲聯部伍備軍械卒保危城同治癸亥擒匪蔓延據城北尚店寨張公耀帥大軍來援劉伯瑗太守合鄉團助之往來商方畧兩月餘克之渠魁殲焉大吏累保加郎中銜 賞戴花翎嘗以乞師赴汝宋風雪中馳數百里得肺癰症瀕危甲子春視弟釗中於京師未兩月忽犯前症兩日夜遂卒欽中初與淡泉先生交務提撕本心擴清私念自號曰爽亭後晤倭文端公嚴辨明季儒術流弊謂穎悟不足恃一以篤實踐履為主改號曰恆溪讀其劄記中論學語可以知其所得矣

張安雅字晏如別號菱湖母高氏號荆布老人教之有法幼聰穎

有奇氣成童能詩弱冠以郡第一人入庠名大噪結交多老宿
俊才與淮甯郝蓉塘韶景賈柳塘堃增太康李又哲濬劉松岩
卹膏同邑王丹君詵桂竇畫村書成以詩酒相酬和時號陳郡
七子惟安雅年最少議論侃侃常屈其座人嗣肄業大梁遊古
吹臺登禪院浮屠望見黃流滾滾一綫自天而下胸次益浩瀚
下筆千言立就歸省後荆布老人授以理學宗傳嚴督之乃掃
淨室縱觀儒先書窮思力索有得輒筆記之疑難處與中表高
欽中釗中昆仲往復質辨弗得弗措且時時與老人談論古今
人物奧理名言以相娛功名富貴視之蔑如自謂天倫之樂雖
三公無與易也旋丁內艱益絕意仕進足不履城市者十餘年
手輯老人形短集訓子語梓行於世當皖匪擾豫曾相國督軍
勸辦募人沿賈魯河築牆數百里以遏西竄因上萬言書直攻

曾相之失曾躓之而不能用同邑袁文誠公督辦西征糧臺邀
入幕與友羅健侯日夕晤談以道義相砥礪文誠奉 詔旋

京安雅涉太華厯峭函到處題詠曰遊秦集及歸假館扶溝義
塾授生徒自擬制義成編題曰唾餘碎璣友人見而異之勸赴
秋闈笑不答文不喜東坡詩不喜漁洋惟寢饋於考亭文集杜
陵詩鈔至老不倦晚年好臨顏董草書遺貌取神識者歎賞自
謂游藝之末不輕示人光緒壬辰卒年六十有九著有得所軒
詩文集藏於家子三昂晶高昂以善繪知名為名流所寶貴亦
能詩風骨峻厲無愧先人

高釗中字勉之幼恂謹父崧雲卒於永嘉任所時方十歲賴母李
氏內教之嚴兄欽中啟迪之篤年十六補博士弟子員為俞子
襄學使所推賞咸豐辛酉列拔萃科 朝考一等授戶部小京

官時土匪日熾父墓被掘與兄奉樞改葬誓必滅賊同曹君庚五夏君耀榮徒步至商邱叩僧王馬前請兵又隻身赴汝寧謁張子青中丞請兵寇平入都供職謁李文清公倭文端公及吳竹如方魯生何子永諸先生相與問學兄病歿京廩扶櫬歸葬郡守劉伯瑗聘主絃歌書院講席同治丁卯舉於鄉光緒丙子捷南宮官庶常散館 授編修旋充 國史館協修壬午視

學湖北諭通省薦樸學篤行之士減裁新生卷費有條陳海疆摺留中充功臣館纂修入直 上書房值黃河決與蔣仲仁奏劾河臣成孚溺職辜恩狀太和門災與同直八人上修省疏留中惟鐵路一事交議又視學雲南與譚敘初中丞議刻理學宗傳隨棚集一二等生員入場分給宗傳一冊俾各抒所見質疑辨難隨手批答士心鼓勵擇可造者提入省城書院肄業滇南

知有正學自劄中始先後保薦篤行之士若干人累升侍講轉侍讀因患泄瀉呈請開缺時年六十二劄中少師王紹陽淡泉先生從姪也因得讀淡泉日記又得孫夏峯張仲誠諸書三先生之學皆宗姚江因以先入為主在郡主講時與羅健侯志伸反覆辨難在湖北與荊州道于次棠亦多質論晚歲又與湖南黃恕軒論學甚契及病中心課自言尤於明道先生識仁說精思熟體若有獨得雖遭家多故而言溫氣和未嘗見其有暴戾之容平生篤於內行事母和顏悅色先意承志敬兄如嚴師兄嫂歿遺幼子弱女撫如己出婚嫁皆自任之趙氏姊早孀呈請旌表又請 勅封姊病日夜奉侍不少懈至其關心民瘼憂水患有致袁子久中翰論疏泥河書值歲荒有致黃恕軒山長言飢民作亂狀使轉達中丞即撥款來賑庚子之變鄉閭洵洵

思亂親赴撫轅請兵防冬皆以一言惠及里黨生平不事著述病中檢詩文稿藏於家其推衍算學曰消寒游藝無子以姪積政為嗣積政字炳如幼孤事叔如父處兄弟循循惟謹外和內剛志期遠大光緒己卯舉於鄉甲午成進士分發江蘇病歿需次士論惜之

夏耀榮字質夫號默齋幼穎悟好深思年十六入郡庠旋食篋光緒乙亥登賢書己丑大挑以知縣用籤分直隸庚寅冬以疾終於里第平生篤於內行幼時在曾祖側依依孺慕出告反面必拜在外館逢佳節必遙拜父病晝夜不離側焚香籲天願減己壽以益親竟不起痛悼欲絕喪葬一遵古禮母歿時會試在京歸至周口聞凶耗痛絕移時始甦星夜奔喪昏悶顛仆者數抵

家痛哭尋母絕水漿求死哀動鄰里作罪己語一字一滴令人
酸楚不忍卒讀既葬廬墓側朝夕上食三年苦決不就牀席處
兄弟恩不失義仲弟其榮早世遺孤毓璜才頗敏教育如己子
處期功三黨親無缺禮朔望集家人講家規祖訓有不率教者
對案不食其人悔改始喜且獎勸之館金一錢不入私房刻苦
自勵多有人所不能者尊師重友古誼篤摯咸豐間皖匪猝至
倉皇避難遇趙月亭師於城南疲不能行耀榮背負數十里至
射橋乞食供師自不食留餘復進師深歎異亂平確山楊于崗
教授來陳倡明師道遂執贄相遇極厚師病歿親視含殮扶櫬
送歸里為立碑於陳又立碑於確誌教思當擒匪擾項高太史
釗中父墓被掘時僧邱大軍駐宋欲往請兵無敢從者耀榮慨
然同往朋友凡有急難輒肝膽相推死生不貳慷慨激昂處事

精密詳慎指示成敗如目覩而數計之知交咸推為不可及尤
恥為無用學凡兵陣水利鄉約保甲無不洞究詳考求可見諸
施行會試留京觀時變隱憂之因撰內修外攘芻論時同邑余
連萼官刑部權榮總角交也深歎為有用才鐵路議起連萼欲
上書當道屬為擬稿苦心積慮數晝夜始就復相對參改感歎
歎歎為之泣下家居凡於世道人心有補者為之必力洋人市
賣妖書惑眾率同人驅逐之光緒丁丑大飢同邑紳設粥場規
畫盡善全活五千餘人遇旱蝗作捕蝻歌值黃水擬築隄行以
勸鄉人為本村立欄青戒賭親睦各社所定章程四方多取法
焉邑書院廢弛袁文識公及邑紳捐款交商生息耀榮為釐訂
規條至今遵守高邱寺僧不法逐去之改設崇正義塾及母欺
山房文社一方人文蔚起他若會文兩以麗澤諸社南北百餘

里皆賴振興課徒嚴立學程文行並勵嚴氣正性望者生畏而接人以和雖後進若等輩質以疑義則直吐胸臆洋洋灑灑剴切動人素不以講學名而於學術異同燭之悉防之嚴粹然一準程朱倡行四禮尤為一方所引重歿前數日猶朗誦大學中庸首章不置其日記自光緒辛巳後寒暑風雨無火閒不事著述縱筆所及無非至理名言歿後子毓琦姪毓璜等搜其散佚僅得內修外攘芻論及遺文雜著藏於家

余連萼字棣堂號孚山性至孝年十四失怙哀毀如禮事母色養備至才思穎異弱冠即餽郡庠家貧常就外館因念母不忍遠離奉迎館中朝夕趨侍母有疾輒憂形於色行不能正履湯藥必親嘗衣不解帶目不交睫雖久不懈光緒丙子列經魁方期得祿養而母歿矣哀毀骨立杖而後起喪葬悉遵古禮不用樂

不散孝不作佛事待客不用酒肉違俗冒譏不計也事叔父如父出入啟告必拜恂恂無違顏叔父亦極鍾愛之處兄弟怡怡無間教諸弟姪尤醇懇詳勉無不盡之心建宗祠修族譜定家規同居數十口內外大小無不謹守禮法終年無詬訾聲一方數十里留心家教者多取法焉服闋赴春闈思母不忘時形諸夢有都門夢母詩六十韻聲與淚下令人不忍卒讀後以地少齒繁兄弟共議析居連萼流涕數日不得已始從衆議應得地百餘畝以長門人衆且大宗奉祀為要僅取薄田三十畝曰是已足矣癸未捷南宮官比部供職維勤部堂多器重之厯得主稿秋審減等各差恆念獄者天下之大命矢公矢慎絲毫不苟心力為瘁時內侍李連英慕其學品因同鄉某屬意焉絕不與通值鐵路議起欲致書當道與友人夏耀榮積思累晝夜務竭

誠以動聽丁亥河決鄭州陳當其衝約同人共勸義捐日夜奔馳股為之腫而月之閒集巨款十三萬金同官多主用官賑力爭不如用紳賑實惠及民卒如所議全活無算己丑夏

天壇


災憂悶數日竟染暑症時愈時發而精神虧損矣自知不起門人張鎮芳侍側勉強起坐索筆大書曰吾生平事業竟止此哉旋歿知與不知交稱為忠孝完人僚案爭來弔哭咸曰吾儕失一良友國家失一良臣及旅櫬還鄉鄰里來觀雖婦女未有不流涕者連萼自少即留心正學又得同邑曾學禮師其善夏耀榮黃學濤淮甯曹若柟諸友以道義相切磋故其成就獨大在家在官公事之暇仍手一編於倭文端遺書尤愛重志在行其所學著有孚山詩文稿藏於家子師端廩生宣統舉孝廉方正秦煥章字文軒廩貢生事親無違志弱冠饒於庠文名噪甚一生

步履端方鮮疾言遽色與人無少長皆接以信義冠婚喪祭一遵家禮嘗開柳溪精舍萃文山房與諸友以道義文章相切磋不規規於章句之學通音律暇則彈琴自娛著有身家解衣食說富貴貧賤君子小人說日箴怒箴等篇藏於家

楊凌霄字伯漢號達齋庠生性篤厚讀書頗鈍好沈思弱冠時得周子書讀而好之應試在郡又得夏峯年譜中州八先生疑道錄益勵志正學訂日記錄存心行事分別善過不敢自欺又與王柳圃余棣堂夏默齋黃省齋曹次樞孫立亭魏肇峙諸先生相師友所學益進與弟凌閣以道義切磋興之所至發為謳吟輒招弟推敲以為樂事二親篤愛溢於辭色父患失血瀝陳已罪焚香籲天為親永壽父歿哀毀欲絕杖而後起晝夜哀號百餘日不櫛髮幾禿喪葬悉遵古禮與弟廬墓三年每哭輒痛不

自勝年甫四十髮白殆盡母歿時凌霄亦抱病一痛而絕移時方甦兩晝夜始省人事病起竭力營葬負土成墳兄弟仍廬墓側大病後又遭大故年近五旬精神耗敗母歿僅八月舊疾復發卒於廬次臨終心清氣定坦然而逝平日立家祠追修四代神主祭儀一仿家禮居喪在廬中晨起必拜墓入祠必焚香再拜病甚遇先人忌日猶勉行四拜禮有高氏姑墓在南頓官道側每過必拜至於郵親黨姻戚鄰無不曲盡其情尤重師友誼李怡亭先生父執也師事者六載左右就養一如事父師歿痛哭數日為文致祭卒哭祥禫凡祭皆有文拜墓必痛哭屏絕酒肉心喪三年性介直懷若難犯與朋輩處慈祥坦易油油如也接引後學諄諄不倦隨人淺深委曲詳盡要以敦倫勵品反身自得為貴講經論文必反覆開導俾曉暢而後已凡為一事必

自問曰是足餒吾浩然之氣否又曰有纖毫不似聖賢處即為不敬其身虧體辱親罪莫大焉病中有曰死亦常事但未聞道而死生為徒生死為徒死矣可乎哉因慨歎不已所輯書有反約窮源錄庭訓述古集宏農名儒考讀朱輯要錄學顏橐鈔觀法隨筆永誦詩鈔愛邵詩鈔二南詩鈔箴銘集要事親則有奉親錄教子則有蒙養紀事其自著有達齋文草怡怡詩草日記訓門人語



項城縣志卷二十三

人物志二

文苑

漢

應劭字仲遠

謝承書曰應氏譜並云字仲遠讀漢書文士傳作仲援漢官儀又作仲瓊未知孰是

少篤學博

覽多聞靈帝時舉孝廉辟車騎將軍何苗掾中平二年漢陽賊邊章韓遂與羌胡為寇東侵三輔時遣車騎將軍皇甫嵩西討之嵩請發烏桓三千人北軍中侯鄒靖上言烏桓衆弱宜開募鮮卑事下四府大將軍掾韓卓議以為烏桓兵寡而與鮮卑世為仇敵若烏桓被發則鮮卑必襲其家烏桓聞之當復棄軍還救非惟無益於實乃更阻三軍之情鄒靖居近邊塞究其態詐若令靖募鮮卑輕騎五千必有破敵之效劭駁之韓卓復與劭

相難反覆於是詔百官大會朝堂皆從助議三年舉高第再遷
六年拜太山太守初平二年黃巾三十萬衆入郡界助糾率文
武連與賊戰前後斬首數千級獲生口老弱萬餘人輜重二千
兩賊皆退卻郡內以安興平元年前太尉曹嵩及子德從琅邪
入太山助遣兵迎之未到而徐州牧陶謙素怨嵩子操數擊之
乃使輕騎追嵩德並殺之於郡界助畏操誅棄郡奔冀州牧袁
紹初安帝時河間人尹次潁川人史玉皆坐殺人當死次兄初
及玉母軍並詣官曹求代其命因縊而物故尚書陳忠以罪疑
從輕議活次玉助後追駁之據正典刑助凡為駁議三十篇皆
此類也又刪定律令為漢儀建安元年乃奏之獻帝善之二年
詔拜助為袁紹軍謀校尉時始遷都於許舊章湮沒書記罕存
助慨然歎息乃綴集所聞著漢官禮儀故事凡朝廷制度百官

典式多勛所立初父奉為司隸時並下諸官府郡國各上前人
像贊劾乃連綴其名錄為狀人紀又論當時行事著中漢輯序
撰風俗通以辨物類名號釋時俗嫌疑文雖不典後世服其洽
聞凡所著述百三十六篇又集解漢書皆傳於時後卒於鄴弟
子瑒瑒並以文才稱中興初有應嫗者生四子而寡見神光照
社試探之乃得黃金自是諸子宦學並有才名至瑒七世通顯

後漢書
本傳

三國

應瑒字德璉祖父奉父珣字季瑜司空掾瑒被太祖辟為丞相掾
屬轉為平原侯庶子後為五官將文學著文賦數十篇建安二
十二年卒文帝書與元城令吳質曰德璉嘗斐然有述作意其
才學足以著書美志不遂良可痛息

三國志王粲
傳及裴注

應璩字休璉瑒弟博學好屬文善為書記文明帝世歷官散騎常

侍齊王即位稍遷侍中大將軍長史曹爽秉政多違法度璩為詩諷焉其言雖頗諧合多切時要世共傳之復為侍中典著作
嘉平四年卒追贈衛尉

三國志注引
文章敘錄

晉

應貞字吉甫汝南南頓人魏侍中璩之子也自漢至魏世以文章顯軒冕相襲為郡盛族貞善談論以才學稱夏侯玄有盛名貞詣玄玄甚重之舉高第頻歷顯位武帝為撫軍大將軍以為參軍及踐阼遷給事中帝於華林園宴射貞賦詩最美初置太子中庶子官貞與護軍長史孔恂俱為之後遷散騎常侍以儒學與太尉荀顛撰定新禮未施行泰始五年卒文集行於世弟純純子紹永嘉中至黃門郎為東海王越所害純弟秀秀子詹自有傳

晉書
本傳

南北朝

袁翻字景翔陳郡項人也父宣有才華為劉或青州刺史沈文秀府主簿皇興中東陽州平隨文秀入國而大將軍劉昶每提引之言是其外祖淑之近親令與其府諮議參軍袁濟為宗宣時孤寒甚相依附及翻兄弟官顯與濟子洸演遂各陵競洸等乃經公府以相排斥翻少以才學擅美一時初為奉朝請景明初李彪在東觀翻為徐紇所薦彪引兼著作左郎以參史事及紇被徙尋解後遷司徒祭酒揚烈將軍尚書殿中郎正始初詔尚書門下於金墉中書外省考論律令翻與門下錄事常景孫紹等入預其事後除豫州中正遭母憂去職熙平初除冠軍將軍廷尉少卿尋加征虜將軍後出為平陽太守翻為廷尉頗有不平之論及之郡甚不自得遂作思歸賦以自見神龜末遷冠軍

將軍涼州刺史時蠕蠕主阿那瓌後主婆羅門並以國亂來降朝廷問翻安置之所翻表論得失朝議是之還拜吏部郎中加平南將軍光祿大夫以本將軍出為齊州刺史無多政績考昌平除安南將軍中書令領給事黃門侍郎與徐紇俱在門下並掌文翰翻既才學名重又善附會亦為靈太后所信待是時蠻賊充斥六軍將親討之翻乃上表諫止後蕭寶夤大敗於關西翻上表請為西軍死亡將士舉哀存而還者并加賑賚後拜度支尚書尋轉都官翻上表願以安南尚書換一金紫時天下多事翻雖外請閑秩而內有求進之心識者怪之於是加撫軍將軍肅宗靈太后曾燕於華林園舉觴謂羣臣曰袁尚書朕之杜預欲以此杯敬屬元凱今為盡之侍坐者莫不羨仰翻名位俱重當時賢達咸推與之然獨善其身無所獎拔排抑後進懼其

陵已論者鄙之建義初遇害於河陰年五十三所著文筆百餘篇行於世贈使持節侍中車騎將軍儀同三司青州刺史嫡子寶首武定中司徒記室參軍寶首兄叔德武定末太子中舍人

翻弟躍躍弟颺本州治中別駕豫州冠軍府司馬

節錄魏書本傳

袁躍字景騰陳郡人尚書翻弟也博學雋才性不矯俗篤於交友

翻每謂人曰躍可謂我家千里駒也釋褐司空行參軍歷位尚

書都兵郎中加員外散騎常侍將立明堂躍乃上議當時稱其

博洽蠕蠕主阿那瓌亡破來奔朝廷於之送復其國既而每使

朝貢辭旨頗不盡禮躍為朝臣書與瓌陳以禍福言辭甚美後

遷車騎將軍太傅清河王懌文學雅為懌所愛賞懌之文表多

出於躍卒贈冠軍將軍吏部郎中所制文集行於世無子兄翻

以子聿脩繼

魏書文苑傳

周興嗣字思纂陳郡項人漢太子太傅堪後也高祖凝晉征西府參軍宜都太守興嗣世居姑孰年十三遊學京師積十餘載遂博通記傳善屬文嘗步自姑孰投宿逆旅夜有人謂之曰子才學邁世初當見識貴臣卒被知英主言終不測所之齊隆昌中侍中謝朓為吳興太守惟與興嗣談文史而已及罷郡還因大相稱薦本州舉秀才除桂陽郡丞太守王暕素相賞好禮之甚厚高祖革命興嗣奏休平賦其文甚美高祖嘉之拜安成王國侍郎直華林省其年河南獻儻馬詔興嗣與待詔到沅張率為賦高祖以興嗣為工擢員外散騎侍郎進直文德壽光省是時高祖以三橋舊宅為光宅寺敕興嗣與陸倕各製寺碑及成俱奏高祖用興嗣所製者自是銅表銘柵塘碣北伐檄次韻王羲之書千字竝使興嗣為文每奏高祖輒稱善加賜金帛九年除

新安郡丞秩滿復為員外散騎侍郎佐撰國史十二年遷給事中撰文如故興嗣兩手先患風疽是年又染癘疾左目盲高祖撫其手嗟曰斯人也而有斯疾也手疏治疽方以賜之其見惜如此任昉又愛其才常言曰周興嗣若無疾旬日當至御史中丞十四年除臨川郡丞十七年復為給事中直西省左衛率周捨奉敕注高祖所製歷代賦啟興嗣助焉普通二年卒所撰皇帝實錄皇德記起居注職儀等百餘卷文集十卷

梁書本傳

明

馬斯和字繼竹穎悟天授總角時即善屬文丙夜篝燈無聞寒暑性理子史諸書無不得其奧義詞賦詩文卓絕一時邑令震彝魏公器重之推為中州冠冕七因棘闈以恩選入都當廷對時銓部奇其文曰遠畧鴻裁切勿小就入北闈領萬厯己酉鄉薦

聯捷南宮為兩河第一人筮仕文水以惠民為心修城垣減差徭興學校鋤強豪潔己愛民風移俗易報績轉秋曹歷郎署多所平反祥刑譽起三被恩綸有公忠粹品醇亮端儒之褒值畿南多事以憂國殞於燕邸生平著作僅存來虹樓文集及清淨一得語兩帙識者惜之

閻坦字平之號磐石安邑主簿廷梧孫也天姿穎異性孝友十歲失恃事父生員耀及繼母邑養無間弟垣方八歲殫心教訓後入庠終不忍分爨兄培乏嗣送終盡禮萬歷戊午亞魁乙丑會副戊辰後淡志進取優游林泉工風雅精岐黃著有羅經圖說及陰虛變理篇解而竹逸園諸詠尤膾炙人口癸未逆闖改項城縣為州設偽官令偽州牧趙某偽州尉陶某以禮聘坦及東存敬兩人皆遠避淮上偽軍門某齋書隆聘仍不應乃籍封家

私拘繫子姪兩人堅決不就棄子破產弗恤乙酉始旋里十畝
閑閑惟知田可耕子可教而已年九十餘終於家二子長銑康
熙丙辰貢士次鎔孫濬登康熙甲子賢書

黃從德字伯明號峻若積學力行與仲弟從貴字涵若同以文章
知名每試輒次第冠軍為司衡者刮目與邑名士王清蒲閻又
新李鵬南聯社敦莫逆交諸人皆捷去從德獨久困棘闈至天
啟末始以明經與廷對除山西絳縣令從貴登天啟四年甲子
賢書為湖廣房縣宰兄弟踵歲後先若輝映焉山西撫按嘉從
德政績卓異交列薦章方期大用乃以病卒於官詩文著作多
可傳者子姓繩繩克肖厥德咸歎仁人有後云

張弘志字狷小號夢蔡司徒遇六世孫也賦性穎慧個儻有大度
居恆篤孝友厚戚里居喪哀毀暨服除人未嘗見其輕言笑兄

弘業故撫其子恆德晉德成立年十四入庠十六食廩餼二十
三登天啟甲子賢書丁丑成進士出馬世奇之門朝士咸慶得
人歸里即出重貲修邑文廟戊寅選直隸廣平縣令時歲饑多
盜創建甓城蠲俸賑恤民賴全活者甚衆邑人士同致頌曰學
深宗孔接踵河南夫子政美歌張空羣冀北神君立生祠志感
茲任二載屢奉旨嘉獎庚辰調繁魏縣士民保留辛巳撫按交
薦減俸行取擢秋官清吏司主政壬午由本司郎中出守江南
常州府至即殫天罡豪奴數輩一郡肅清有徐姓者罪擬絞以
暮夜金三千求脫不為動卒正國法其惠愷清正大都若此崇
禎癸未卒於官其文章行誼俱堪不朽惜遭世亂著述罕存

國朝

東存敬字心一號垌野其先東海蘭陵人也漢太傅疏廣之後廣

曾孫孟達避莽難易今姓至晉代束皙為著作郎卜居於吳之丹陽名儒輩出組綏蟬聯明初一支遷項祖朝陽由明經授平陽學博存敬少穎異甫弱冠登賢書時居停主人偶不謹於扁鑰將鹿鳴大典所賚悉為梁上君子持去當事督居停償之謝曰予不忍以此累主人也生平淡忘利祿因遘疾不計偕者十餘年鍵戶攻岐黃術曉暢宗旨暇則為詩詞尤善鍾王體於城府不設藹如也癸未避亂淮上不受逆闖偽銜諸子有受累者弗顧乙酉旋里饘粥幾不給處之泰然順治己丑赴禮闈成進士壬辰對策丁酉選廣平司李至則清理案牘數年未結者旬日結之益官四襍寬猛得宜多所平反著有祥刑錄一卷諸上臺交章薦欽取銓部主政未幾卒子七人皆入庠仲子紳字見齋號珂里屢薦不售貢成均授弘文院內閣撰文中書撰

維揚郡丞應攝高郵江都如皋興化四邑篆革弊鋤奸隨車所
至頌聲作焉以內艱旋里惟餘清風兩袖而已甘心林下與邑
賢詩酒聯歡杜門課子以自娛

王啟明字海曙廷諫之孫穎異絕倫讀書十行俱下總角能文日
試萬言倚馬立就嘗笑謂同社云諸公何言做文直寫文耳年
十八入庠二十四登賢書順治戊戌己亥禮闈兩列乙榜任安
陽縣教諭十餘年以老乞歸著有槐堂世業為子孫法其文今
猶膾炙人口

王耿言字純如幼聰敏性寬和謹慎家貧呬唔不閒寒暑為文光
明磊落饒有正笏垂紳之概及補弟子員猶扁戶伏讀足迹不
履城市康熙壬子魁於鄉甲戌捷南宮中丞閻公器重之嘗云
他日調羹國是輔弼皇猷專有賴也未及見用而卒

韓塌字雲門號半峩性孝友遇事識大體讀書寓目輒成誦家貧甚燕香火照讀寒暑弗輟初聘某氏未娶而瞽及塌補弟子員外氏恐貽中饋累請改聘塌絕然曰夫婦人倫之重詎因盲傷倫紀乎結褵後伉儷甚篤生四子而妻病沒塌竟不復續膺康熙壬子選拔戊午登賢書任陝州學博日與陝士陟礪山望龍門以吟以詠隨地施化而著有陝序詩集及課士文若干卷補永城教諭裁成多士不異在陝弟壇字禹門塌躬為迪訓首以鉛華為戒嘗曰天然去雕飾庶乎得之壇學成擢外翰秉鐸鄴郡之安陽德教與塌齊名

閻濬字繼協坦之孫氣度端嚴學養深邃登康熙甲子鄉榜未見用識者惜之幼讀書明敏過人為文直入大家閻奧遇事識大體雖分內物亦遜讓弗遑絕不競取嘗云君子修形不修影得

形則是非利害同出一源舍形而惟影之圖則利不出於是害不出於非者有之君子得為者理不得為者命不知命何以為君子洵至論也著有詩古文詞若干卷

王允貞字爾毅號鶴洲髫年入庠試執冠軍文名噪起以選拔登康熙乙卯副車設帳鄭湖之濱從遊採芹獲雋者踵相望尤工詩古文詞有得者寶若拱璧晚司鐸鎮平嚴條規勤課試文風丕振年七十六終於官署著有浣花亭詩古文集二十卷制藝數十卷藏於家子七人皆有文學長弘霖以貢生掌教汜水馬鳴廷字興甫號德函河津令文烜冢孫也資稟岐嶷篤好詩書父孕乾道德文章甲一邑鳴廷不就外傳與弟鳴鑾親受庭訓年十六補弟子員學憲孔賞其文以為賈太傅復出明年食餼屢擢高等文名藉甚弟鳴鑾早宴鹿鳴鳴廷棘闈屢困康熙丙

寅僅拔辟雍扃戶潛修誦讀弗輟邑侯周慕其德業學問敦請為內傅生平事親孝交友信取舍廉見佻達陰險者望望然去之而樂與端人正士偕子賢文才卓犖孫鏞克承家學早年游洋

衛永荃字馥庵性孝友初與之接恂恂似不能言久之始藹然覺可親叩以疑難清辨滔滔莫能窮早年食餼邑諸英俊結社課文皆推永荃為宗盟邑侯鈕公奇之曰此逢年技也願其編曰璧合載永荃文甚夥以數奇僅成歲薦司鐸穎上教澤廣被門下士號曰東園先生未幾卒於官生平善事指不勝屈其關係尤鉅者塌橋河口多為項患先是中丞鹿飭填立碑禁挖歲久碑淤蔡民中變其說永荃三訴大憲掘岸丈餘得遺碑申禁如初項不被水患者幾三十年

以上舊志

王大受字東村性和易弱冠饒於庠為文根柢左國史漢及唐宋諸大家以歲貢選授西平訓導待諸生如契友諄諄教誨多所成就解組歸族中子弟好學者每相往還談論輒竟日弗倦從姪孫曰珩以詩古文冠一邑大受成就之力為多所著東村雜著藏於家

王日烈字位午廩生父有孝行日烈性癖於詩年九齡即諳聲律嘗以春山洗雨樹啼鶯之句見知吳眉庵文宗因號春山又以染盡綠苔三月雨之句見知郡侯家貧因嗜古耽吟飄然有欲仙之致為詩重標格嚴音律閉戶深居垂二十年不履城市一肆力於詩嘗從淮甯雷抱癡方曉借秦漢以來諸大家集心摹口追久之學日益富詩日益工而其名亦日益噪一時士大夫耳其詩咸造其廬如郡伯王孟亭邑侯王雲卿張關燈雲間胡

堯音桐城江介夫范讓水諸名宿皆與往來分韻聯吟悉深憐
愛日烈不愛不求簞瓢陋巷晏如也日烈幼失恃稍長失怙中
年妻子俱喪家徒壁立饑寒莫支所著涕血草百餘首閱者皆
為隳淚而日烈境愈苦志愈堅不向人作可憐狀集中所載八
無諸詩寄托遙深嘗以平生詩稿就正於朱草衣山人丹山人
為作序彭湘南選其詩入據經樓詩選日烈為人急交遊重聲
氣中州共推為名士庭戶蕭然而交遊聲氣如故又其為客每
為朋友作曹邱生不駐口多方作計使得其所其情若有不容
己者所著虹溪草堂詩稿一卷又嘗與雷抱癡選國朝名詩
未付刊姪化隆善畫山水

馬世高字樸庵天資英敏性孤高弱冠即通經史搢紳先生咸器
重之年二十三以七藝遊泮旋食餼作道德顯晦原流序闡發歷

聖相傳之秘與韓遠公桓高冠雲首以古學相砥礪康熙戊子長沙太守傅公延課其子世瀟遊蹤所及著荆楚山水遊記以見志其文尤膾炙人口

高首字冠雲其著述不可考與馬樸庵世醕韓遠公桓以詩古文名一時于聯珠跋荆楚山水遊記云此記乃余舅氏馬公諱世醕字樸庵先生原本從而潤色之則高公諱首字冠雲先生筆也余舅氏文本自高古而高先生律以聲韻為馬為班各抒所長至遠公先生跋雖寥寥數語則又兼收班馬之長嗚呼三先生皆吾項人傑也對此不覺有景仰之感焉觀此則知首之深於古矣而竟泯滅無傳可惜也

王轍字子由性穎異經史過目輒不忘為文簡潔精悍日可數十紙康熙庚子領鄉薦雍正癸卯成進士嘗設教於蔡遊其門者

多知名士晚罹誣訟毫不介意賦詩作文怡如也尤工詩著淨生老人詩集膾炙人口晚年家更窘多託諸詠歌可謂貧而樂矣其思親詩尤愷惻動人壽八十餘歲臨終口占一絕云一夢醒來富貴無盧生夢醒悔長途今人不醒盧生夢日向盧生夢裏圖

王曰珩增生性嗜古初學舉子業意弗屑竊取左國史漢唐宋諸子書讀之少有得輒自喜苦為塾師所抑勒不得馳騁其才以自見及遊其叔祖東村先生之門乃大放厥辭東村一以理法繩之初猶疑其過刻久始心折氣平為文日就矩矱卓然成家叔祖子由先生嘗以詩相勸期以遠大終老牖下識者惜之于聯珠字品九按察使嗣昌之從姪貢生馬世瀄之甥也學博才富又得諸先達裁成之為文多可傳世惜皆散失今所見者于

嗣昌傳浮光記珠考平泉草木記數篇而已

閻煥字麗天 思貢生性孝友睦族和鄰接人無貴賤皆以禮不干與公事惟以讀書談道裁成後學為殷殷教法嚴整以躬行為先文法金陳字尚歐顏學者翕然宗之檄授廣文以衰老辭著有泱溪集訓子譜策問津梁若干卷

王茂松字碩輔一字霖庵父秉直家奇窮不作乞憐態或周之非其人不受也鄉鄰雅重之茂松生有異稟讀書好深思少嗜奇有高蹈山林之志醫卜諸書靡所不涉尤精奇門壬遁之學於舉子業不甚措意一夜兀坐讀漢書婦張氏煮茗佐之蹠蹠甚苦意若有所期者問故曰予女流何知丈夫志然幼時見優人演楊椒山妻擇夫曰節義必如楊某始嫁之後楊以忤大臣死妻哭之痛觀者俱為動邑甚有泣下者予心竊慕焉茂松曰異

哉椒山明之義士子以是期我我願何不足然我將來必有不與椒山同者則時之殊也因舉班書漢文帝事為婦細言之婦曰信如是則君將效誰我將來居何等碌碌者予不願也茂松感婦言益自勵乾隆乙卯舉於鄉性至孝值會試期父偶病辭不赴父兄敦促之不得已忍淚就道行數日竟託病返自是鍵戶讀書益講求經世之學著長治鑑長治策等篇指陳利弊擬進之當途有慮其賈禍者曰儒生稽古以致用也君子立言以裨世也予固將以今日之文章作他年之事業用吾言而不吾罪吾之願也嫉吾言而重吾罪亦不之悔也素慷慨好施獨於屈己求憐者恆禁弗與謂其自待已卑視我太淺失所以推解之意尤急公好義遇難不避包河界項蔡之交項居蔡下游受上蔡諸水之害最烈先是乾隆十二三年江夏王君道暉宰項

憫民之阨於水也始為相度形勢於包河之東北因路為隄起包河橋至魏家莊以防楊水又詳請撫軍鄂公奏明於十字河心建修石壩以堵洪流於是項無水害者四十餘年嘉慶初元六月大水蔡人乘漲挾傳路隄項人以事有成案迭控不休而茂松居近決口竇首其事迭經項蔡兩縣陳汝兩府會勘因各私其民各是其議歷十一年不決不得已叩 闕呈訴奉

旨交兩湖總督馬公會同豫撫查辦因委河陝汝道張公會同二府縣勘得此隄關係四縣安危亟宜照舊補築議定未及開工而蔡人復於舊口下十餘里之汝隄挾開四十餘丈汝陽民憤極與之械鬪致傷蔡民關某已而隕命汝蔡守令皆曰是可制舉人王某之命矣即希以人命翻隄案詳請邀准矣時縣尹繆公憤然曰王某之冤不伸則此隄廢此隄廢則項城盡成

澤國矣其何以官乎力為茂松伸辯先是蔡人挾汝隄時其委員監築者為陳州分府楊公世福實館茂松家汝蔡民鬪茂松不知也聞蔡人以死制茂松亦憤然上其實於撫軍因得併案提省會審擬結首挾隄之常大化刺配山丹幫訟之許免升流諸嶺南而茂松得無恙時嘉慶十五六年也事平謁選授懷慶府學訓導十六年九月教匪李文成等倡亂據滑縣

詔陝

督文毅公那彥成帥師討賊提督楊忠武公遇春副之賊連陷道口桃源各鎮勢張甚懷去滑三百里人心洶洶驚皇逃竄河內令吳君為義依茂松籌辦防守事宜茂松故精奇門因揚言曰小醜跳梁蕩平可計日待人素神其術乃稍稍定及忠武公敗賊道口鎮進圍滑文成潰圍出奔太行據輝縣之司寨河北鎮楊果勇公芳追勦之文成將西竄逼近懷境懷郡戒嚴郡守

袁公偕茂松防堵修武乘機迎勦賊不敢西楊公芳大破之文
成自燔死我軍合力攻滑十二月拔之滑縣平是役也茂松雖
未衝鋒陷陣然運籌帷幄安撫衆心保障一方斷賊出路以致
窮寇無歸立就殲除洵屬有功大局所著有奇門心悟三卷四
清齋絮語四卷行於世又有覃懷紀遊平滑紀聞等書

張四維字扶國號桐園歲貢生幼岐嶷年十三應童子試邑侯某
奇其文有國士之目尋饒於庠家貧藉館金以供甘旨邑孝廉
夏桂軒贈言有妙裁黃絹憑心纖潔養白華仗舌耕之句每歲
科試輒冠多士偶榜發無名甚異之頃特榜曰張某文冠七邑
字超八學合郡士子無不驚服從遊日衆多所成就歿後門人
建碑墓前以誌教思

王詵桂字丹君幼穎異長博通羣書留心經濟不屑屑於帖括之

末見有干仕進者獨恥為之為文汪洋浩瀚灑灑數千言卓然
自成一家詩沈雄悲壯有杜牧遺風所交皆當世知名士同邑
張君菱湖竇君畫村談詩論文相得甚歡又與同郡郝蓉塘賈
柳塘李又哲雅相知愛邑孝廉夏君瑞麟極推重目為高才第
一嘗有詩曰滿腔真熱血四海一丹君因時際兵燹挾其家遊
陽夏鹿邑轉徙滎陽成皋間每為人畫戰守策皆奇中嘗上太
康令祝垵亭書謂非行堅壁清野法不足以制賊死命祝上其
書於當道卒用以平賊由是名大噪名公鉅卿爭延為上賓張
子青中丞聆其議論歎為奇才欲任以職夷然不屑也然亦感
德知己凡政事之得失知無不言言無不盡與曾相國論平賊
方畧切中要害又與李文清論僧邸書僧將驕兵悍喪師辱國
必矣後僧果遇伏死不出所料其卓識如此生平著述多散佚

嗣孫拱宸搜羅舊篋僅得詩文若干首

夏瑞麟字仁趾號桂軒嘉慶辛酉拔貢丁卯舉人天才穎異讀書數行俱下嗜學如渴積書數萬卷皆手自丹鉛司原武許州鐸請業者戶外履滿經其指授多喜為創獲聞忠義事輒慷慨激昂閒形諸詩歌遇博雅士辯論馳騁雜以諧笑晝夜忘倦歸老牖下執簡披吟無倦態與王君詵桂為忘年交以四海一人目之蓋取其才相儷也平生所著詩多隨手散去摘其尤者題曰敝帚自享子蓉初字麗江庠生蓉峯字連萼號朵山廩貢當捻匪亂出資重建北門樓及子牆炮樓為衆倡又辦團練助官軍克復張崗寨得獎以教諭用司鐸孟津同縣主王團練守城并主講河清書院終於任所著有拋輓引玉詩集孫恩慶字澤普五品藍翎候補河東巡檢有幹才會孫濟濟能世其業

鄧伯磊字筠岩玉幅次子幼穎敏弱冠饒於庠試輒冠軍名噪七邑尤工應制排律闔郡罕匹援例貢成均就教職歷署陳留靈寶伊陽南召各學篆泠署無事輒與友人倡和為樂長篇鉅製疊韻至四五次不倦家居與王詩漁明府吳禾笙山長往來酬答尤多平日詩文得其指授者多知名士如郭瑗威騰霄錫歐陽繡之馬秀芝姪錫圻諸人其尤卓卓者也歿後子錫綸檢其遺稿有一杉山房詩鈔二卷梓傳於世錫綸字筱筠光緒壬午舉人署鹽山縣知縣

張瑞楨字恩周號雨挺光緒甲午科舉人幼岐嶷為文精深淵懿縱橫恣肆不規規一格人莫能及邑人高子卓如才望重一時論人少所許可獨傾倒焉嘗贈以詩有風度端凝張九齡沈酣子史醉六經觀書朗朗眼如月下筆振振走雷霆之句其為名

流推重如此早歲以首選補博士弟子員旋食廩餼益肆力於文詞嘗慨粵匪之亂赤地千里瘡痍滿目人多不推致亂之原而委之於劫運因著辨劫論灑瀚數千言多有闢世道人心語甲午中日開釁士鮮用命憤作討倭檄義正辭嚴人多傳誦時議以東三省數州及臺灣一島割讓於日復草萬言書力陳東省發祥之地為京師外蔽臺灣亦百戰經營所得萬無可棄理約同鄉公車諸人求代遞以阻其謀而和議且告成不及咸同閒粵匪竄擾豫東邑城岌岌不可保瑞楨與諸紳畫城守策賴以保全復念族衆散處安輯非易倡議聚族而居修寨自衛首捐資助工自經紀之於是張寨張大莊寨次第興築嘗因督工往來其閒遇匪幾不免寨成以兵法部勒諸子弟人有固志賊不敢逼鄉里窺寨之利爭取所著練寨會小引師其堅明約束

鼓勵士氣諸法稍稍行之寇禍賴以獲免者衆歲乙未將偕計吏入都資斧無所出人有勸糶儲粟者不可曰歲將太飢寧售地以濟用留此儲蓄猶得以活飢者未幾果驗人服其先見禮聞既罷適高子卓如亦解組歸乃與更定書院章程除積弊又議修縣志籌畫甫就而高子歿矣復集族人議修家乘立宗祠未竟厥志而卒瑞楨於書無所不覽而尤邃於易論者謂自來言易者主程氏則言理主邵氏則言數各守師承以尊其說瑞楨獨能發揮旁通不拘迹象著修竹齋文集門人為立教思碑

宦績

南北朝

袁聿修字叔德七歲遭喪居處禮若成人九歲州辟主簿性深沈有鑒識清靜寡欲與物無競姨丈人尚書崔休深所知賞年十

八領本州中正兼尚書度支郎中齊天保初除太子庶子以本
官行博陵太守大有聲績遠近稱之累遷司徒左長史領兼御
史中丞司徒錄事參軍盧思道私貸庫錢三十萬娉太原王义
女為妻而王氏以先納陸孔文禮娉為定聿修為首寮又國之
司憲知而不劾免中丞尋遷秘書監天統中詔與趙郡王叡等
議定三禮出為信州刺史即其本鄉也時久無例莫不榮之為
政清靜不言而化自長史以下爰逮鰥寡孤幼皆得其歡心武
平初御史普出過諸州悉有舉劾惟不到信州及還都人庶道
俗追列滿道或將酒脯涕泣留連競欲遠送時既盛夏恐其勞
敝往往為之駐馬隨舉一酌示領其意辭謝令去還後州人鄭
播宗等七百餘人請為立碑斂縑布數百疋託中書侍郎李德
林為文以記功德勅許之尋除都官尚書聿修少年平和溫潤

素流之中最為規檢以名家子歷任清華時望多相器待許其風鑒在郎署之日時趙彥深為水部郎中同在一院因成交友彥深後重被沙汰停私門生藜藿聿修猶以故情音問來往彥深任用銘戢甚深雖人才無媿蓋亦由彥深接引為吏部尚書以後自以物望得之初馮子琮以僕射攝選婚姻相尋聿修常非笑之語人云馮公營婚日不暇給及自居選曹亦不能免時論以為地勢然也素品孤官頗有怨響然在官廉謹當時少匹魏齊世臺郎多不免交通餉饋初聿修為尚書郎十年未曾受升酒之遺尚書邢邵與聿修舊款每省中語戲常呼聿修為清郎大甯初聿修以太常少卿出使巡省仍令考校官人得失經兗州時邢邵為刺史別後送白紬為言聿修不受與邢邵書云今日仰過有異常行瓜田李下古人所慎願得此心不貽厚責

邵亦欣然領解報書云老夫忽忽意不及此敬承來旨吾無聞然弟昔為清郎今日復作清卿矣及在吏部屬政衰道喪若違忤要勢禍不旋踵雖以清白自守猶不免請謁之累入周位儀同大將軍吏部下大夫東京司宗中大夫隋開皇初加上儀同遷東京都官尚書東京廢入朝除都官尚書二年出為熊州刺史卒子知禮大業初卒於太子內舍人

北史本傳

劉達家世忠孝性沈簡緘默善書翰洪武初薦人材官至刑部尚書

張日昇成化丁酉舉人授陝西咸甯學博敷教先躬率嘗修食食荒歲舍生墜山西孝義縣知縣取肺石島雄戮辱之政既行而宿稅無敢踰逋矣民愛之為立祠尋陞知開州

任繼祖字述之陽曲知縣修之孫成化甲午舉人丁未進士除戶

部司主事遷副郎有明達之識惜早卒

閻廷梓號新泉隆慶丁卯舉人授河津縣令有慈父母之稱厯濟南別駕擢守深州減燕費禁絕妓樂革預藉以寬民置長單以杜弊緝盜釐蠹築滹沱修城池捐金賑饑建塾課士致仕歸深州人德之請入名宦祠

趙宗昉字旭伯號宋乾先是大梁人有宋裔也七世祖以事避至項改姓李父蘭亭博學有聲藝苑昉善讀弱冠補弟子員旋食餼試輒冠軍開館授徒一時名雋多出其門嘗道拾遺金數甚鉅遲其主還之分半致謝笑弗受邑令高其義賜扁旌之以泰昌恩貢除成安令善政卓著調山東日照時有大盜騎劫黨羽頗衆下車即擒之一境肅清直指禹公列薦剡將大用之偶以事忤勢宦遂拂衣歸家居課子姪皆成立後復原姓趙著有燕

居詩集

張承恩字君寵號東軒五歲而孤祖司徒遇撫之及遇歿家道寔衰仰承母鄧氏慈訓勵志向學淹貫經史諸子以祖廕由官監入太學筮仕江南濡須丞適牧闕攝州事期年多惠政士民醵石頌德晉山左登州別駕清操尤勵吏畏民懷致仕歸登人攀留不得如失慈父歸里後創建文昌閣於黌學東南隅以培閩邑文運復助建啟聖祠設義冢四區於南郊推財好施難以悉舉暇以詩酒自娛年七十卒

閻煖字德照號又新深州知州廷梓伯子也萬曆壬子捷於鄉丙辰成進士己未殿試二甲筮仕戶部管德州草場以骨鯁不媚權要挂議歸里六年再起部郎晉姑孰守時魏璫用事與時不合甫一載即乞病歸甲戌復守廣平政平人和期年五騰薦牘

因失本屬開府歡以殘患劾免風裁嶽嶽未獲大用措紳惜之
衛道字以承號孟心磊落豪曠性不諧俗早歲偃蹇小試操觚家
無與聯社者時邑人馬君斯和德望隆重名士盡出其門道欲
修弟子禮馬以其狂拒之既而見其文擊節曰此逢年技也立
當飛去果於萬厯癸卯登賢書次年成進士厯任中書舍人戶
曹山西清吏司員外郎本部郎中己酉分校北闈是歲馬以恩
選廷試於京銓部奇其文令北雍就試榜發而馬入彀適為門
下士及進謁道仍讓左人以是服其雅量越二載擢江西廣信
府知府鋤暴安良嚴斥請託一郡頌廉明焉秩滿陞鹽運使解
組歸訓子教家與故交詩酒相娛年五十有一無疾而逝
閔烜號師竹萬厯戊午拔貢天性孝友器宇英挺筮仕湖廣承天
府別駕治績卓異監察御史曹履吉嘉其廉能列狀於朝復以

江漢循良旌其門後晉階甯州牧益勤宣德意案不留牘卒於
官馳驛歸葬

馬文烜字振南號義符少穎異讀書一覽無遺應童試邑令白公
一見奇之與堂叔斯和長兄文炳齊名年二十六膺萬曆甲午
鄉薦乙未赴禮闈列乙榜第一名里居幾三十載未嘗有干牘
入公門處鄉鄰曲盡禮讓有過則正色相規人咸畏而愛之晚
年任河津令省刑罰恤行戶捐俸修橋減河灘租賦多實惠及
民嘗大旱禱雨立應民益感戴而骨鯁自持當事者早心銜之
及逆璫募建生祠文烜獨弗應愈櫻讒搆紳民詣大憲力白其
誣溫檄允留竟辭歸津人士泣送載道攀轅不得行者竟日為
立生祠肖像祀之越三禩復致大木二章為身後壽歸里後饋
粥僅給意豁如也暇則跨蹇攜樽從一二奚童縱遊自樂若未

嘗從仕者卒年七十有二子三悉入庠孫鳴廷康熙丙寅選拔有傳鳴鑿字殿傳幼承庭訓昂藏自好落落不與俗士伍性孝友嗜學與兄鳴廷以學業相砥礪文名重一時康熙壬子舉於鄉丙辰成進士方期大用中年病沒惜哉

時語字含章有至性父應上病語日侍湯藥衣不解帶三閱月父病始瘳語嗜學敦行由明經謁選任山左介休縣丞攝武鄉黎城兩邑篆所至多善政如減虛派革耗銀捐俸救荒修城堞人民賴之撫按交薦擢關內華亭縣令以病歸睦族恤鄰里黨交稱卒年七十八季子由己貢明經餘皆列邑庠

趙頰字二韓號東軒厚重緘默早歲饑於庠天啟丁卯登賢書崇禎癸未成進士官庶常國朝起用山東鹽運司經歷以疾歸杜門謝客布衣蔬食不異寒素終日手不釋卷惟以課子為事

著有東軒文集若干卷鹽幕集事一卷子三皆知名士

國朝

趙大生字子復號西園宗昉家子也少儻工詩古文詞及草篆

八分書弱冠遊歷各省國朝定鼎經畧洪承疇委署滇省白

鹽井提舉司提舉事恤竈商禁私販平市價政聲大著

綸

音窠錫陟瀛郡丞瀛介燕齊之區風俗獷悍萑苻時警擒撫有
方鈴鐸無警後攝津門參議篆大學士馮溥稔知其才能薦於
朝晉慶陽守三秦之人聞風震疊以積勞卒官著度青萍詩集
藏於家

韓淑文字孟一號愚齋明定興縣丞恭无孫也幼穎悟嗜讀四壁
蕭然晏如也學成淵博文章為一邑冠順治丁酉經魁辛丑成
進士初仕順義俗悍多盜擒撫兼施民賴以安八年報最晉中

書不願內遷改補長甯邑彫敝甚勞心撫字閱七月晉刺無為甫下車革允費禁胥蠹鋤豪強懲唆訟政教嚴明大奸巨惡皆洗心革面旋以疾請告士庶焚香郊送數日不得出境歸里後宦橐蕭然惟以清白貽子孫日與邑賢士詩酒唱和縱談古今自娛若未曾膺一命者享年六十有三無病而卒

閻萬鍾字孟辨號裕庵性友愛學識優長為文典實工麗髫年入膠庠順治丁亥拔貢廷試二名授城固令與士民接恂恂若家人邑民多輕生圖賴巨姓率因此破家萬鍾至按實治之刁風頓革境內多盜密廉得之正以法盜亦寢息年方強任遽解組歸日惟與故友聚首談心以為樂

韓桓字遠公號省蒙無為州刺史淑文四子也幼穎異十歲補弟子員十五食餼弱冠膺康熙丁丑選拔文詞書法靡弗精工南

北闈獲薦十二次卒未售以教習積勞筮仕江右樂安令下車
即革重耗以甦民困值歲歉捐俸賑濟又通詳上憲截漕若干
石民賴全活樂安素號健訟懲其尤閩邑肅清興學明倫風俗
為之丕變尋丁內艱去邑民遮道攀轅赴上憲懇留者數千人
至今尸祝以上舊志

張

廷福字爾介號芝庭明司徒遇裔孫性清靜寡言語稍長舉止
若老成人好讀書敦孝義年十七入邑庠越歲食饒雍正癸卯
貢成均丙午登鄉薦丁未捷南宮乾隆甲子在籍修邑乘甫脫
稿旋補四川之冕甯辛未選江西廣信府貴溪縣政尚寬仁務
以誠信動物民有強梗難治者以蒲鞭示辱人皆感化遇盜賊
責以大義亦無不洗心向善政簡刑清四境帖然有夜不閉戶
之風值大疫捐廉五千緡分給貧民為藥餌資歲復大飢餓殍

載道時宦橐蕭然又不忍視民死不救遂慨捐兩萬金以賑之家產數百畝典鬻殆盡或詰之曰公任宦數年而家業一空於心安乎曰我瘦而民肥何不安之有讀書數十年正為此時用耳上憲嘉異升涇州知川臨去合邑人民攀轅泣留如失慈父母治涇一如貴溪涇舊無志乘延福為創修之數年政成因母老決計歸里晨昏娛親以為樂乾隆二十六年卒曾孫樹琨字瑤函號西圃性行端方嗜讀書手不釋卷年十六入邑庠旋食饒道光辛卯舉於鄉選內黃教諭栽培士類遇貧生嘗資助之平生事親孝教家勤儉尤好義急公濟貧扶危邑修蓮溪書院監督不辭勞瘁咸豐六年飢捐貲助賑捻匪倡亂數逼縣城樹琨與同人日夜巡視不懈樹琨子永熙庠生永熙子之堃光緒甲午舉人戊戌進士分發四川至西安病卒旅次士論惜之

劉耀庚字西爽嘉慶辛酉拔貢庚午科舉人胞兄耀林乾隆丙子
舉人宦直隸辦驛差賠累數萬金賣腴田八百畝補償耀庚毫
無吝色析居時亦不齒及秉甯陵唐縣鐸均以造士為職蒙清
中丞保舉卓異陞授四川慶符縣令下車問民疾苦其大者修
書院養濟院均徭役聯保甲興學校士民作十德詩紀其事尤
善決獄有梁貴沈獄逾三十年力稟上憲白其事幾獲咎卒如
所請釋之大吏知其能凡疑難重案多委訊並有越境陳牒求
劉公訊者一時有隔縣爭迎慈父母隨車紛誦又青天之頌後
調達縣未赴任委雷波廳通判加知州銜探夷滋事誓死守相
持三晝夜賊有怠志擇紳士有膽畧者王茂盛盧鳴岡付壯勇
五百出賊後夾擊之賊大敗去城賴以全雷陽有土城白上憲
改建擇險要添防汛共計修大石堡一座土堡五座武弁衙署

十所礮樓礮臺火藥局演武廳棧場箭道諸工次第俱舉歷三
寒暑始歲其事墜邛州去雷民哭送數十里不忍別建生祠二
所旋以積勞成疾引告家居三載起病回川委署潼川知府八
月清積案二百餘囑匪亂帶兵堵勤全郡無驚補邛州年逾七
旬致仕歸子東序道光己酉選拔東旻廉貢署永城縣訓導孫
廕琦庠生廕琛附貢廕理歲貢候補知縣廕瑄廕生有學行惜
早卒

高味雲字芝崖號晚江嘉慶己卯科亞元庚辰聯捷進士以知縣
歸部銓用旋得 咸安宮教習未授館歸設帳授讀袁端敏公
甲三幼即從遊登第後始離門下謁選授浙江麗水縣縣為處
州府首邑在萬山中地瘠苦民情刁悍命盜案層出每鞠囚至
夜分不得息有縊戕案夜移屍城濠山逸不能得密偵之有易

菟童夜卧橋下語竊聽識之如其言蹶之案遂獲庚子充營
差未幾洋人擾海疆揚威靖夷而將軍相繼督師邑當其衝時
戎事初興帥令尤嚴備供帳時稊糧運軍裝製刀械皆委諸縣
令稍不給則軍書插羽封刀至悉竭蹶應之兩年大吏以其賢
且勞調授永嘉任瀕行曰永嘉濱海輪船至頃刻耳若有警不
得顧妻子乃獨往次年始迎春口至時已積勞成疾疾篤子欽
中間遺言曰守拙又曰汝若得第州縣官不可做遂卒年甫五
十次子釗中方十歲宦橐耗於供應公私債積不得歸觀以應
解款冊報軍需局局員以軍務未清不能核飭先歸六年欽中
以庚辰進士官吏部而報銷案至仍着賠尾欠時袁端敏公為
給諫貽書浙吏代白高某居官廉苦狀欽中乃假旋稱貸以償
嗚乎廉吏誠可為而不可為也

袁保慶河南項城人咸豐八年舉人隨其叔父給事中袁甲三勦辦粵逆咸豐八年攻克安徽六安州城經勝保等奏請以光祿寺署正即補 允之十年捐納郎中簽掣刑部時順天府

府丞毛昶熙督辦河南團練保慶奉

旨發往河南交毛昶

熙差遣委用十月山東竄匪七八萬人句結亳州出巢捻逆牽掣官軍意圖西竄毛昶熙檄保慶偕內閣中書劉錫鴻等督率練丁迎擊之於開封歸德等處首先陷陣鏖戰數日斬擒以數千計賊敗歸亳州老巢河南全境安謐敘功 賞加四品

卿銜並

賞戴花翎十一年正月捻酋劉添幅大股竄擾

宋集雷集平臺一帶保慶與道員周照徵等會合總兵成景分帶兵練前後夾擊連破丁小樓張椿等四寨賊自是不敢遠出同治二年羗民趙鳳岡句引捻首王九現李如松盤踞項城之

尚店寨深溝高壘以拒官軍保慶督率團勇與總兵張曜等攻克之俘斬畧盡生擒李如松等十九名河南巡撫張之萬上其功奉

旨賞加鹽運使銜四年張之萬奏言保慶在籍辦防勦髮捻親冒鋒鏑動中機宜請以道員分發省分歸候補班前

先補用疏下部議格不行尋浙江巡撫馬新貽奏請以道員留於浙江補用

諭令保慶速赴浙江吏部核與成案不符奏寢其議五年調取引

見奉

旨以知府發往

山東七年以保慶勦辦捻逆迭著戰功

命免補本班以

道員仍歸山東儘先題補適兩江總督馬新貽奏調保慶差委上飭赴兩江俟差竣仍回原省九年奏留江蘇仍歸原班酌量補用尋署江甯鹽法道十二年卒於官兩江總督李宗羲疏稱保慶講求吏治整飭蠶網經理河渠諸大政不辭勞瘁備極周

詳沿江上下要害分布防軍井井有法請以事蹟宣付史館並請附祀等語奏入

諭曰已故署江甯鹽法道袁保慶前在原任漕運總督袁甲三軍營頗資得力後在河南南陽等處督帶團練歷著戰功旋經調赴兩江於吏治河工賑務及整頓防軍均能實事求是據所奏各節卓有賢聲賚志以歿殊堪矜憫著加 恩將袁保慶事蹟宣付史館附列表甲三傳後並附

祀袁甲三臨淮專祠以彰蓋績

國史館原傳

王式金字榮甲號芝圃少聰敏丰致翩翩個儻不羈以咸豐辛酉拔貢謁選得陝西安定縣令縣居隴右之北山地瘠民貧輸納維艱式金每解已囊代解民德之時逆匪數萬衆往來衝哭境內居民倉皇奔竄又以己財築城鑿池備軍械有警登陴固守親冒矢石援桴鼓助戰三年閒賊數至卒無患大吏嘉獎屢欲

量移上縣以其有膽知兵安定民方依為保障不果移及內憂去官不旬日城遂陷里居言動謹飭恂恂若無能者蓋得力於閱歷者深矣年未四十卒

袁保齡甲三次子同治元年舉人兄保恆自有傳咸豐間甲三視師淮上保恆及其從兄保慶皆從征役保齡奉大母郭母陳里居尋甲三積勞成疾保齡太息流涕曰吾父力疾督軍諸兄頻年戎馬吾不能執干戈衛社稷非丈夫也所不忍離者重慈奉養耳祖母及母嘉其志命之軍時兵餉奇窘躬歷各營拊循眾志固結雖饑困中踴躍用命同治二年蒙城餉竭苗沛霖踞懷蒙窺陳宋甲三已乞病歸復被命督辦團防保齡周歷各團撫其反側各圩曉以利害使苗逆不得合從內犯張總愚率大股再犯陳州復會合兵團分籌堵禦危城獨完羣捻紛竄孤

其黨羽官兵乘之皖豫肅清甲三以己子不列奏報曾國藩一見目為國士尋甲三卒蒙 恩賞內閣中書五年補缺十

年記名內用十一年恭校勦平粵匪方畧勦平捻匪方畧告成保侍讀遇缺奏補光緒三年恭纂 穆宗毅皇帝實錄全書

過半

賞花翎並換四品頂戴恭纂

玉牒告成奏獎俟

補侍讀缺後以知府在任即選並交部議敘四年以兄保恆奉命籌辦豫賑盡瘁以卒因念直晉陝豫洊飢不速拯流亡伏莽一煽蔓延大局匪第為桑梓患時方補侍讀慨然以兄志未竟豫民未活呈請開缺歸里辦賑盡出家財益以稱貸遠近聞風仗助大河南北全活無算舉凡賑災善後興水利置農具靖奸宄無不力陳撫臣次第施行豫撫涂宗瀛以捐助豫賑不敢邀獎奏聞稱保齡念累朝恭養之恩遵父兄勇於為善之教倡率

鄉人剋圖博濟毀家紓難出於至誠 詔敕部照各省賑例

給獎遂以道員不論雙單月即選加三品銜五年 實錄全書

慶成 賞二品頂戴保齡歷官內閣中書侍讀十有三年於

天下要政博考遠覽熟悉掌故七年直隸總督李鴻章以其曩
侍甲三軍中襄事諳習戎機博通經濟才具勤敏疏調辦理北
洋海防營務諸差時准練各軍集於津沽保齡勤加蒐討遇有
兵民交訟之案率右民抑兵以保良懦八年朝鮮亂黨內訌毀
日本使館日兵輪駛仁川口日使臣以兵入漢城保齡奉檄援
護慶軍統領吳長慶方率六營東渡保齡建議韓王孱弱宜大
舉戡亂選得力軍數道並出清理案犯更訂條約遣忠正廉誠
胸有古今者統勁旅長駐彼都扶起孱王實行監察效衛文治
衛力策富強與遼東三省左提右挈實東方一大屏障若敷衍

了局韓其不盱食矣力請調宋慶所統毅軍為後盾吳宋皆甲
三舊部曾同袍澤願以軍旅自任直隸總督躉其言日人知我
有備遠與韓議和時我國方擴張海軍當事謂宜持重議遂中
寢韓亂既定直隸總督疏請以道員留直隸補用乃益銳請整
頓軍實是年冬赴奉天旅順口督海防工兼辦水陸軍防務先
是奉檄履勘沿海通籌形勢無以易旅順者跨金州半島突出
大洋水深不凍山列屏障口門五十餘丈口內兩澳四山圍拱
形勢天然誠海軍之奧區也於此濬淺灘展口門創建船塢分
築礮臺廣造庫廠設外防於大連灣屯堅壁於南關嶺與威海
各島遙為聲援遠馭朝鮮近蔽遼瀋實足握東亞海權匪第北
洋要塞也至是規畫建築九年李鴻章奏飭駐工督率稱北洋
防務以旅順最為繁鉅西國遇此天險可為水師窟穴必以全

力駐之北洋歲收經費有限祇可就現在財力逐段竭蹶經營開山濬海工大費鉅購料運器於西洋派員雇夫於直省與內地工程迥異初旅順於七年間試辦築壩濬澳久無成功灘地沮洳海潮怒撼百計不足捍禦保齡受任迭與提督宋慶丁汝昌臬司周馥道員劉含芳等察看妥籌次第興作其築攔潮壩一役於冰雪風霧中督工役植立壩上四十日仿粟毓美石壩純用塊石護之始獲堅穩時荒島初闢海聲礮礮內地賓僚率相視裹足保齡晝督工作夜草文書恆以一身兼數任其勞苦非常人所能耐法越構衅法人聲言北犯旅順口僅成黃金山礮臺一座保齡跋山涉海測地鳩工不數月而東西兩岸七臺成又設備戰土臺無數分置克虜伯大礮添置防營環營數十丈植梅花椿阱沿岸伏旱雷海口伏水雷以防敵兵暗襲其時

津沽陸路二千里未設電綫急請興建聯絡防軍節節布置聲勢俱壯法艦遂未敢北窺其規畫旅防戰守也則以嚴防後路為要義任守者自西南之饒頭山訖東南之勞律嘴分段布置敵船逼近洋面環攻各臺則守臺者當之任戰者專顧後路與礮力不能及之零星口岸大隊游擊隨宜策應倘各臺堅守而寇來襲我則任戰者當之其通籌金州旅順大局也則以客軍久戍非長策添練土兵為要義以遼人守遼土以遼土養遼人嘗就海口隙地種桑柘教民紡織設學堂導民忠義屢陳當事思起長白寶廷駐金州部勒金復五城旗兵寬籌教養而以宋慶專司簡練以開遼民敢戰之風聯奉直之疆防合兵民為一體尤於議懲庸將不稍貸請申軍律如臨陣潰逃或畏蕙不前宜照前明傳首九邊例於正法後傳示南北洋以昭炯戒十年

夏李鴻章會同吳大澂張之洞等出洋巡閱以旅順新築礮臺營壘堅緻曲折頗據形勝操演水雷旱雷均漸熟習設海上有事牽制敵船冀可憑險固守合疏奏聞稱保齡督飭之力會朝議立海防衙門大治水師李鴻章飭保齡密議乃建六策一曰重事權謂宜設海防大臣一員凡七省防軍制兵在海口二百里者司道都統提督以下歸節制黜陟用舍均以海防大臣為衡關道任兼海防宜照糧道屬漕督例以海防大臣為專轄一曰定經制由部頒關防制同六部設叅贊一視四五品卿大臣駐北洋叅贊駐南洋或暫置翼長二員一駐渤海一駐南洋別設南洋水師統領一凡歲時查閱防營得失師船勤惰制器良楛皆為叅贊若翼長職之又設四司曰軍政曰船政曰度支曰考藝每司設官由中外大臣遴薦一曰建軍府應以旅順為

建牙為師船歸宿以威海備巡閱一曰簡船械宜將機器製造
統一整頓中分兩大端曰製造宜分寄責任槍礮宜規定畫一
一曰籌用費減額兵汰江海舊防一曰儲人才宜設水師小學
大學練船別設科目優予出身洋洋萬餘言而終之以無競維
人且謂人才不出縱使船堅礮利其孰與奏折銜之效慨乎言
之逮甲午之役日人逆慮攻旅順不能破適銘豫各軍分顧遼
瀋後路空虛遂得乘虛襲擊坐失天塹論者惜之是年十一月
韓亂黨附日本者乘沽口封凍駐韓防軍皆屬北洋電綫未通
意欲斷其接應謀為不軌韓逆首金玉均等戕害大臣迫脅國
王偽請日兵入衛舉國震動保齡從子世凱駐兵朝鮮迎護韓
王馳報保齡急電北洋由旅順分籌接應立集水陸軍轟冰渡
洋駐馬山口以厚兵力密稟力陳法氣圖南警報方惡宜款法

以紓兵力調南北洋各艦合力救韓規定久計救李昱應以堅
韓民內嚮韓政刑失當中國力盡保藩之義須越俎代謀若虛
與委蛇終為越續語極切摯李鴻章據以入告 朝命吳大澂
續昌馳往查辦亂黨由北洋設備接濟日使井上馨後我軍三
日始至懾於聲勢復與韓定約實保齡在旅順籌濟策應之力
日本鑒於壬午甲申中國防軍兩次赴機迅速詭議互相撤兵
遂有天津之約朝鮮君臣亦堅請赦昱應旋即釋歸而外侮內
患逆黨紛持無兵力以鎮之卒未能悉如保齡初議保齡以韓
勢日危乃請於邊門鳳凰置重防西連旅順東接瑯春舉張曜
督治之遙顧朝鮮庶金旅防軍首尾相應請添漢城至邊門電
綫通軍報資控制李鴻章皆用其策陳奏施行尋李鴻章奏派
保齡從子世凱駐朝鮮總理交涉通商事務因言自古交鄰視

乎強弱兵事與使事相維持未可專恃筆舌日俄爭先圖韓英德實陰忌之宜聯與國以拒敵厚邊備以圖戰北洋兵輪時巡仁川大同各口弭患無形韓王被閔妃黨蠱惑媚外甚力非速清君側實行改革莫挽危局李鴻章以為然卒以牽於時勢未行也十二年 醕親王親閱旅順深以海防布置合宜袁保齡尤為得力奏 聞下部優敘十五年七月病卒於旅順防次李鴻章奏陳其經營旅防保護朝鮮以死勤事請照軍營積勞病故例優卹 詔從之賜祭幛 贈內閣學士廕一子如例宣統三年河南南京官吏部右丞孫紹陽等以保齡勤勤卓著遺愛在人略謂光緒閒豫省奇荒禦災捍患厥功尤偉呈請將其生平事蹟宣付史館附列表甲三傳後得 旨俞允子世承廕生山東候補直隸州知州世顯江蘇候補同知世敷附貢生

分省通判世同廩貢生湖北候補知府世傳附貢生二品頂戴

候補四品京堂世威候選布政司理問

史館原傳

黃宸熙字楓怡號亮臣讀書有大志祖錦鳳司訓偃師宸熙幼即隨任未應童試納粟入監屢困棘闈袁文誠公聘為記室管西征糧臺參贊軍務得與羅健侯太守李少白太守庾仙舫直牧張公和太令以文章道義相砥礪學業大進保舉知府歸陝西候補譚中丞委提粵餉航海萬里不數月數百萬金運入關中米價減而軍威以振秦隴肅清與有力焉上憲極為器重欲授以官未及而卒先是在粵有上袁文誠公書萬餘言無非為國家君民計自粵歸便道省親購書數萬卷藏於家以通志堂經解皇清經解二書捐入蓮溪書院以嘉惠後學子三恪度庠生從戎幕保縣丞恪濟恪周俱業儒著有泛海仙館詩選帆集

高積健字體乾號毅庵五齡受書朗誦終日無倦性沈毅寡言笑
羣兒或言不及義輒掩耳走年十四學為文理解清晰不支不
蔓壯年邁往尤致力於身心性命之學同治庚午登賢書光緒
丁丑成進士以知縣分發四川莅大竹大邑兩縣皆有政聲壬
午四川鄉試同考官所得多知名士未幾以目疾去宦宦橐蕭
然歸里後仍安貧守約督飭兒輩讀書無或閒暇則背誦遺經
以自遣或不能記憶必使兒輩按卷而繙閱之蓋好學純篤不
以盲廢而或厭也居嘗教二子曰我家於明季自山左遷項世
業詩書家傳忠孝予四齡喪母抱恨終天壯歲鄉居又罹兵燹
然自問入世以來處己待人胥存忠厚讀書稽古力戒浮靡雖
未能深合古人或不為古人遐棄汝輩勉之著詩文集數卷日
記百三十卷藏於家子三長敦善早歿次贊善自有傳次鴻善

字翊廷丁酉拔貢

高積勳字卓如吏部主事欽中仲子麗水知縣崧雲孫也幼讀書文思英發成童入邑庠旋食廩餼同治初從張勤果公克復尚店寨議敘教職時家道中落積勳銳意功名慨然有投筆之志入袁文誠公西征幕逾年文誠奉詔旋京壯志未遂念先人皆起家科第幡然仍理舊業中光緒丙子鄉試丁丑聯捷成進士觀政刑部上游稱其才為同僚冠復慨然曰資格限人欲立事功須二十年後改知縣銓授浙江青田縣縣在萬山之中素稱瘠苦歷任官規避賠累到任即求調以故案積如山盜賊猖熾積勳手批口判月餘舊案以清巨盜邢有保負隅深山肆掠為害歷任憚其難辦壅遏上聞幾至燬原乃披瀝實陳請兵聲討上官韙其議從之積勳轉輸供應懸賞發偵卒獲邢逆以

獻百姓鼓舞頌禱三年政成人和量移仁和首縣五年以大計卓異保陞同知升用知府赴部引見旋格於例仍回任候升署任某百計挽之檄攝鎮海篆到任數月值中日構兵縣孤懸島嶼夷船游弋礮聲不絕耳居民逃匿積勳處以鎮定人心稍安期年任滿決計歸田當在仁和時前任邢為鄉世誼中丞衛之摯交也沒後宦囊尚裕藐孤幼弱恐不能守屬積勳代為經紀俟其長歸之積勳抵家親詣汴招其孤悉歸之曰汝已長成宜體先人意善為保守其不負故友也生平取與然諾之間類如此卒年五十有九子咸善能讀書守先業

歐陽繡之字辰堂號蘊璞幼沈重寡言悟聰穎過人讀書目數行下淹貫經史年十六府試冠軍補弟子員旋食饒邑當兵燹後村落邱墟田園荒蕪上稟力陳民間困苦流離狀蒙

恩按

戶發倉賑濟給牛具籽種年二十九登同治庚午賢書光緒丁丑成進士 欽點刑部主事以親老告降有邑人薛鳳德考

取太醫院吏目病沒京寓為經紀其喪隨櫬旋里辛卯春授山東高苑縣知縣是年霖雨傷稼詳請一律停征紳耆製聯有德澤旁敷衆人毋官方澄敘一條冰之頌適大府檄督濬小清河悉力調護民不知役丁內艱服闋入都選授兵馬司正指揮差滿授直隸井陘縣甫到省庚子變作東西洋聯軍入都崇文簡公在保定聞變自縊死繡之鄉試座師也親視含殮封其柩時官吏皆望風瓦解署慶雲仍冒險抵任境內奉匪猖獗繡之督壯勇幹役擒其魁置諸法復以計散其脅從地方漸就安謐又拏獲妖婦紅燈照數名將首惡正法有良家女被煽惑者令其親族保領署滿飭赴井陘本任井陘為京師門戶西連秦晉

川隴貢使絡繹不絕又兼洋商在境內修鐵路開煤礦交涉繁劇卒無踈失紀錄嘉獎治行第一積勞成疾喘疾卒於任所時年六十五子三鵬獻邑廩生鵬印鵬舉俱太學生

袁保基字立亭由廩貢報捐兩淮鹽大使歷充兩淮釐局差加捐

花翎同知指分江蘇丁外艱光緒三年飢在籍辦賑服闋引見到省候補歷委各局提調委協解東京豫甘等省餉丁封海運差使跋涉出力蒙保知府加鹽運使銜十三年河決鄭州奉委坐探節解餉源合龍後蒙保獎奉

旨著以知府補缺道員

升用加二品銜委金陵水西門保甲疾惡稽匪多施善術嗣蒙憲委辦上海布捐總局到差一載積勞成疾卒年五十九子世釗字勉堂直隸候補通判鹽提舉銜世鈞字秉政知府銜分省

補用同知

袁保純字粹庵郡庠生以胞伯端敏公蔭知州選雲南南安州親
老告近選山東莒州蒞任即懲衙蠹伸儒懦興文教政聲卓著
調署益都知縣補德州知州所至皆有聲光緒己亥項飢電屬
家中糶買豆粟頒給族中貧戶保全甚衆感其惠者立碑宗祠
以誌不忘卒於任所子世謨字顯廷四品銜東河補用同知

馬秀芝字瑞字父萬峯疏財仗義重道尊師德望孚一邑母鄧氏
賢淑知禮子二秀芝其長也性孝友與弟蕙芝怡怡無間幼讀
書有穎思矻矻不懈弱冠郡試第一人入邑庠旋食饒列同治
癸酉萃科是年膺鄉薦外和內剛見義勇為遭咸同閒寇亂業
師陶潛庵被誣從賊繫於官父命出百口相保不能得時張文
達公駐節汝南秀芝隻身往訴竟得白同學生某或誣為盜嚴
刑誣服決有日矣秀芝慷慨倡義激動公憤卒雪其冤家瀕泥

河上下游因水興訟釀成重案秀芝邀同沈阜兩邑紳上訴皖
豫中丞各委大員會勘乘閒見豫委朱觀察為畫策案始結上
游又奉中丞檄挖河實以鄰為壑復為邑令杜師竹創挖河不
如修隄議稟三上始得請發帑鳩工兩岸七十里屹如山無人
戴之呼為馬公隄光緒庚辰大挑以知縣分廣西因太翁年暮
告近改安徽仍以迎養不易遲其行皖夫吏咨催終不肯就道
旋奉諱服闋赴粵西為層臺器重兩委藤縣淮新釐務明定章
剔積弊溢解至七千餘金委署武宣邑多盜難治蒞任即會防
營勦辦如寮略灣甘張紙札等處久負固皆計擒其魁散其脇
從餘黨悉平又修城堞興學校懲惡豪政聲大著去之日父老
攀轅塞道及補貴縣政事如在武宣大吏專札嘉獎有武舉秦
某豪於贊與劉姓有隙誣為盜殺之事發賄七千金嚴卻之即

提兩造於城隍廟一訊而服置於法當題一聯云自昔不愛錢
倘存半點私心幽明共鑒爾今慚作吏特祝兩半舊案神鬼效
靈又富商某持制軍檄赴貴開礦先啖以利許列股並以五千
金為壽立卻之通稟以阻其事其他善政難枚舉因籌海防加
花翎同知銜陞遷在即值新政漸興執行為難力請開缺不許
復電懇回省就醫旋告歸抵里布衣蔬素與鄉人處油油如也
適靈霖為災道瑾相望出百金為倡函請邑人鄧麗邦善士集
款賑之又樂與賢士遊結社延師造就多材宣統紀元官紳籌
辦新政動多齟齬以秀芝為衆望所歸敦請措商浮議始定武
漢變作朝政日非歎曰大事去矣憂憤抑鬱飲食漸少尋卒年
七十二秀芝家道素殷而嗜學重道如不及中年作吏無慚學
道愛人乃急流勇退棄官如敝屣雖兩任要缺宦囊蕭然優游

林下十餘年視鄉人疾苦或一邑利弊猶隨時補救及抱病呻吟而憂國憂民未嘗一刻置可謂出處一道始終不渝者矣子五炎蒸歲貢直隸候補府經歷雲蒸桂蒸潤蒸嵐蒸庠生

袁保頤字蔭臣禹州訓導鳳三子也年十四失怙隨從兄文誠公

保恆讀書京邸同治壬戌以伯父端敏公蔭授戶部主政辛巳

丁內艱哀毀盡禮服闋補陝西司主事擢獎以知府候選適從

兄保齡督辦旅順船政乃攜之赴津託以家政會劉莊肅公開

府臺灣召保頤隨辦軍務比至臺治軍有法士民感戴後辦理

滬尾海關稅務滬尾為臺南北財政要樞徵權未能得人財源

日涸逮保頤莅滬視事月徵數十萬兩臺政務均利賴之因積

受煙瘴致疾聞從兄保齡訃病益沈重夫人白氏割股療之病

稍痊可乃乞假力疾回津料理喪務扶柩旋里安葬時項之叟

陔店河渠淤塞道路梗阻保頤捐貲疏通行旅至今稱便事躬
旋臺灣值漳番之亂隨劉莊肅公勘平逆番卓著偉績敘功以
道員儘先簡放加三品銜辦理營務處並善後事宜及邵小村
中丞奉命撫臺尤深器重之凡軍務要政咸倚畀之兩臺
山嵐瘴厲內地隨軍隊死亡過半保頤捐廉優恤俾遺體歸鄉
里其無告者則購義塋以葬之凡施藥施棺及設義學種種善
舉皆特捐廉俸以為之萬眾戴德口碑流傳不絕會合肥龔仰
藻星使出使英國奏調保頤為參贊行抵天津以積勞成疾卒
子二世斌湖北知府世恪

張淑棟字堯松幼聰敏外和內剛志期遠大無世俗齷齪態年十
八入邑庠旋食篋家中落資館穀以養課徒寓嚴於寬多所成
就登光緒己丑恩科賢書與同年友楊君凌閣相交甚篤一

日見其與某友戒吸洋煙書遂痛自悔憤取煙具悉毀之禁絕不復入口甲午成進士觀政刑部刻苦自勵見者謂其平日佻爽之氣收斂盡矣戊戌春歿於京寓懷才未展世多惜之

郭書堂字簡齋六歲失恃其祖極鍾愛之束髮受書穎悟非常十歲能詩文十六入庠旋食餼壬午以優貢登賢書甲午恩科捷南宮司秋曹在京供職清苦自勵庚子兩宮西幸隨

扈秦者及護從

宮車還京師方思展其所學未幾丁外艱

聞訃奔喪哀毀幾致滅性讀禮家居主周口西華兩書院講席服闋入都得咯血症歸里後旋卒生平孝友事繼母如所生兄弟怡怡無閒言教子有方三子景燕廩生景岱景嵩皆庠生高贊善字襄廷大邑知縣積健仲子也幼警敏讀書有大志工書法弱冠以郡試第一人入庠光緒甲午優貢朝考二等加捐知

縣分發安徽署定遠篆循聲大著適渦陽亂作奉委帶軍馳
賊平制軍劉公保奏以直隸州用賞戴花翎嗣署太和邑居曉
西鄙盜賊出沒號難治甫下車擒其魁置諸法民賴以安有悍
舟駐杞縣境日常聚賭大為民害立擒治之斃杖下以此幾罹
不測士民詣省代訴者千數百人事得白歲饑請賑無冒無遺
貧民均霑實惠他若修文廟興教化濟河道禁聚賭禱而立應
捕蝗免災善政多端不悉著調亳州知州亳為四達通衢地接
三省商賈輻湊多豪族悍弁到任一年復大治薦擢道員以知
府候補直隸總督袁公知其能將大任之未幾疾作卒於亳年
三十五士民祭弔者皆慟哭失聲太和民老幼婦孺聞喪哀泣
返櫬時沿路設奠執紼送者數百人紳耆稟請崇祀太和名宦
祠著有渦匪紀畧詩文集稿藏於家

劉永慶字延年總角受書即不沾沾於帖括嘗謂讀書以求用世
匪特弋取功名光緒十一年冬袁公世凱出任朝鮮通商交涉事
知永慶素有遠志延與俱佐理諸務措施悉當袁公依為左右
手迭派襄辦龍山交涉通商事務韓語學堂監督仁川領事等
差海外宣勤凡九載由縣丞遞保至直隸州知州十九年中東
釁啟却差內渡二十一年軍務處王大臣奏練新建陸軍袁公
實總其任敦勸出勦軍事歷充軍未製造轉運糧餉諸要差二
十六年袁公巡撫山東隨節前往總理軍儲二十七年以知府
謁選充全軍參謀營務處適畿輔拳匪肇禍應 詔勦除繼
以畿輔肅清保陞道員當近畿匪燄方張宵小聞風響應山左會
垣民心搖亂曹州一帶盜匪尤多永慶以齊魯屏蔽京師再一
蔓延將全局糜爛迺請袁公專遵主勦之 詔始終不少假

以陳卒能迎機消弭全境久安事後邀薦得

旨交軍機處

記名簡放並加二品銜當事奏設北洋軍政司以永慶一人主持繼復奏派赴日觀操躬親考驗每事求詳歸國後於軍隊內務大加整頓兵事益徵進步二十九年直督袁公特薦有才識閱通志趣正大請破格錄用之語

召對稱

旨重膺存

記之典至是蓋已仰邀

宸眷將大用矣是年冬京師特設

練兵處倣日本陸軍省之制分設三司以總全國軍事執政奏永慶知兵奉

旨賞加副都統銜充軍政司正使未幾

特授廂白旗漢軍副都統自開國三百年來永慶實首邀異數三十一年改設江北提督遂拜攝江北提督之

命仍兼漕

河鹽務諸政鎮道以下統歸節制並加兵部侍郎銜軍事得專奏報 詔旨有云江北地方重要宜有精強得力之大員以資

統攝時永慶年僅四十有四每對子弟言及 君恩稠疊輒
感激涕零誓必委身報國 陞辭之日 聖訓尤注重改練
新軍念治兵必先籌款江北異常瘠苦措手為難迺與兩江周
制軍躡蹙商推舉所擬籌者凡百餘萬不數日而定議謂警察
為治安之本淮北盜風素盛欲清其源則宜先練巡警開辦後
盜弭民安成效既著復擬逐漸推行乃復奏請設立警察員弁
學堂款不足更捐廉以濟之江北防營積弊甚深零星分駐不
知操防為何事迺調集到浦親加點閱裁汰老弱增加薪餉督
令訓練旋遵章改為巡防馬步八隊規畫防地布置極為周密
三十二年春練兵處奏撥陸軍十三協歸江北訓練爰開辦督
練公所昕夕籌畫不厭求詳以江北兵事尚待擴充急宜造就
人才以備任使遂奏請特設陸軍速成學堂親臨考校勸諸生

以立志立品養成軍人資格諄諄勸誨所以期之至厚值大雨時行月餘不止江北各屬積潦成災各處搶米之案層見疊出清江亦以乞食勢將肇亂永慶晝夜焦思預籌補救繼以湖河水勢增漲為歷年所罕見上下游險工疊報復為之派兵助工屢次冒雨親往查勘憂勞太過舊疾復發或以節勞勸永慶謂但使江北數萬生命得免流離一身勞瘁何足惜嗣是徐海飢民紛紛南下復日夜籌議賑糶與南京蘇州函電交馳為民請命又因駐防各兵辛苦工作親往拊循兼查水勢驟雨忽至露立河干衣盡溼致為寒邪所中歸而病劇次日遽薨易篋之前猶為賑糶事倚枕復南京電函其勤勞國家可謂至矣

袁世敦字厚甫捐鹽大使分發淮北疊委要差張勤果公曜撫山東咨調之密保以知府用派管帶營務處兼巡河工時教匪滋

開帶兵撫勦及俞中丞接篆信教縱匪世敦被議除職光緒庚子鄂督張奏邪術誤國罪及無辜開復原官仍歸原省委用周袁兩中丞接任皆派全魯翼長隨帶一營以積勞卒子二克復庠生次克勳

袁世廉字清泉庠生素有幹才匪魁張天罕肆行搶掠府縣急捕不能得有人偵獲恐遭反噬世廉慨然詣縣送案正法閩邑稱快初捐理問保知縣候補北洋有樸實耐勞之獎歷保知府道員用光緒十一年游歷朝鮮閱時務知交涉事宜甲午戰後投効聶軍總理蘆防營務處庚子會匪亂作微服去省母山東助設減成捐局以救急需母卒奉櫬回籍卜葬後豫撫派全軍翼長時祥符沙壓荒地官派升科起租鄉民聚眾抗拒幾釀大變世廉出為排解眾感之送匾額奉調武昌辦督銷淮鹽總局奉

署徐州府兵備道莅任未幾患風痺請解任復委大通鹽局督銷疾轉劇養疴彰德尋卒子二長克成次尚幼

附

李罕之陳州項城人也為人驍勇力兼數人少學讀書不成去為僧以其無賴所往皆不容乃行乞食酸棗市中人皆不與罕之擲器于地裂其衣又去為盜是時黃巢起曹濮乃往依之巢北渡江罕之與麾下走淮南自歸於高駢駢表兖州刺史歲餘秦宗權急攻兖州罕之不能守還走項城收其餘衆依諸葛爽於河陽爽以罕之為懷州刺史巢已敗走爽降唐僖宗拜爽東南面招討使以攻宗權爽表罕之副使使以兵屯宋州又表河南尹東都留守秦宗權遣孫儒攻河南罕之兵少西走澠池儒燒宮闕剽掠而去罕之壁澠池歲餘諸葛爽死其將劉經立爽

子仲方仲方年少事皆任經經慮罕之兒勇難制以兵攻之罕
之返擊走經慮罕之追至鞏縣陳舟於汜水將渡河經遣張言
拒之河上言反背經與罕之合攻河陽為經所敗退保懷州已
而孫儒陷洛陽仲方奔於梁梁兵擊走儒罕之襲取河陽言取
河南皆附於梁罕之與言皆爽叛將事已成乃相與交臂為盟
誓同休戚不相忘罕之御衆無法性苛暴頗失士心而言善治
軍旅教民播殖務為積聚罕之用兵言嘗供給其乏罕之求取
無已言頗苦之不能輸罕之召言軍吏笞責之言益不平罕之
悉兵攻晉絳言復襲河陽罕之奔晉晉表罕之澤州刺史使李
存孝以兵三萬助罕之攻言言求救於梁罕之敗於沅河乃歸
太原李克用延之帳中罕之留其子頌事晉乃之澤州日以兵
鈔懷孟閒啖人為食居民屯聚摩雲山罕之攻殺之立柵其上

時人號曰李摩雲是時晉方徇地山東頗倚罕之為捍蔽李茂
貞等犯京師克用以兵至渭北僖宗以克用為邠州四營都統
表罕之為副破王行瑜加檢校太尉食邑千戶罕之自以功多
於晉私謂蓋寓自吾脫身河陽賴晉容我未能有以報之今行
老矣無能為也若吾王見憐於一小鎮使休兵養疾而後歸老
幸也寓為言之克用克用不對他日諸鎮擇守將未嘗及罕之
罕之心益怏怏寓告克用懼罕之有他心克用曰吾於罕之豈
惜一鎮然鷹鳥之性飽則颺矣光化元年潞州薛志勤卒罕之
遽入潞州使人啟晉王曰志勤且死新帥未至所以然者備他
盜耳克用大怒遣李嗣昭攻之罕之執晉守將馬溉伊鐔等遣
子頎送於梁以乞兵梁太祖遣丁會守潞州以罕之為河陽節
度使行至懷州以疾卒年五十八罕之初背梁而歸晉晉王以

罕之守濮州罕之留其子頌與莊宗遊甚狎後罕之背晉以歸
梁晉王怒欲殺頌莊宗與之駿馬使奔於梁梁太祖得頌父子
大喜使與友倫將兵以衛昭宗故頌當太祖時常掌禁兵末帝
誅友珪頌與其謀拜右羽林統軍澶州刺史事唐歷衛衍工州
刺史累遷右領軍衛上將軍天福中卒年七十贈太尉五代史本傳
按罕之生當五季起於盜賊仕梁已貴顯乃背梁仕晉又背晉
仕梁臣節何在但舊志既載之未便刪削附於宦績傳後亦所
以昭炯戒也後之覽者或有鑑於斯云